

# *ILO DUVHA KHA KHALIVARI*

2 Ndi a ni livhuwa, Murathu Neville. [Murathu Neville u ri, "Fhaṭutshedzeani, mukomana!"—Mudz.] Mudzimu a ni fhaṭutshedze, Murathu Neville. Ndi a ni livhuwa, nga maanda.

2 Ndi matsheloni avhudzi, dzikhonani. Ndi u tondiwa u vha fhano thaberenakeleñi hafhu, matsheloni ano, u shumela Murena, nga ndila ya u rera Ipfi na u rabelela vhalwadze. Huno ndi livhuwa nga maanda ḋuvha lino.

3 Huno ndo mangala, ndi tshi tou dzhena. Mukomana o da tsini huno a ri, "A thi ṭodi u fana na wa mapele a songo fanelaho we a fhodzwa." Ho vha hu Mukomana Wright. Ndo mu rabelela, huno Murena o mu fhodza tshothe. Huno u ḏa, a tshi khou tswimila, u khaḍa tshanda tshanga, huno a amba zwauri—zwauri u ḥoda u livhuwa Murena nge—nge a fhodzwa. O ḥoda u vhuya huno a livhuwa. Ho ṭuwa hothe. U—u na mutakalo wo fhelelaho zwino. Ri livhuwa uvho vhuṭanzi.

4 Huno Charlie, inwi na Mukomana Jeffries, arali ni tshi funa u, ḏa hafha na dzhia izwi zwidzulo ngeno n̄ha. Huno ni a ḥanganedzwa u fhirisa, ngauralo a ni nga tei u ima. Muñwe mukomana heneffho, na Mukomana Wood, itonu ḏa ngeno. Ni... Hafha hu na mafhethu maṭuku, mavhili hafha kha bannga, ngauralo a ni nga tei u ima. Ndi a tenda, mafhethu mavhili hafha, nahone, ee, no vha ni tshi nga ḥanganedzwa u fhirisa u ḏa na dzhia aya mafhethu.

5 Ri takalela u...ndi a tenda zwo ambiwa, nga tshiñwe tshifhinga, "Ndo takala musi vho ri kha nne..." Mudzimu a ni fhaṭutshedze, mukomana. [Mukomana u ri, "Tshifhinga tshothe ri takalela u vha tsini ha mureri."—Mudz.] Ndi a ni livhuwa. Ndi a livhuwa, ndi a ni livhuwa. "Ndo takala musi vho ri kha nne, kha ri ye n̄duni ya Murena." Iyo ndi pfanelo na dakalo la Mukriste, u ya n̄duni ya Murena.

6 Ndi tshi sedza u mona hothe, ndi tshi vhona vunzhi ha khonani dzanga vhu hone, matsheloni ano, ndi pfa ndo takadzwa nga maanda nga hezwi. Ndi takalela u vhona Mukomana na Khaladzi Dauch fhano, vha bvaho Ohio. Ndi vhona Mukomana na Khaladzi Armstrong heneffho murahu, ndila yothe u bva Ohio. Mudzimu a ni fhaṭutshedze nothe, na vhoiñwi-vho. Huno, oo, nga u tou sedza u mona hothe, ni vhona vhanzhi nga maanda, zwi ḥo nga u kondā u wana madzina avho othe. Khaladzi Hoover, ri takalela u ni vhona ni hone, matsheloni ano, ni tshi bva ngei Kentucky. Huno Charlie na Nellie, Mukomana Jeffries na muṭa wawe, na vhanzhi nga maanda vhe hone, vha bvaho nn̄da ha mudi.

<sup>7</sup> Ngauralo ri lavhelela tshifhinga tshavhudzi Murenani, matsheloni ano, ri tshi lavhelela uri Mudzimu u do tangana na riine nga ndila ya u fhatutshedza mimuya yashu na u ri shumela zwithu zwine ra zwi ḥoda.

<sup>8</sup> Huno ndi tshi lavhelesa fhethu u mona hothe, arali nda swika hune nda vhidza khonani dzanga dzothe u mona hafha, ndi nga dzhia tshifhinga tshinzhisa tsha nga matsheloni, ndi tshi khou bula vho fhambanaho. Zwi nnyita uri ndi pfe ndi wavhudzi u vhuyelela tshividzoni, u vhona vhathu vhothe vhe hone, uri ri tangane.

<sup>9</sup> Naa zwi do vha hani musi ri tshi swika Ṭadulu, huno ri tshi tangana Henengei u itela itsho tshifhinga tshavhudzi tsha vhuṭama ha lini na lini, ha U Ya Nga Hu Sa Pheli ri rothe, u mona na Khuluṇoni ya Mudzimu, na phatutshedzo dzenedzo dze ra dzi tama? Riñe, Henengei, ri do itwa ra nga Ene, nahone nga tshifanyiso Tshawe, na Muya Wawe u kha riñe, u mu rerela na u Mu shumela lwa Vhutshilo-tshothe hothe, na kathihi ri sa neti.

<sup>10</sup> Itonu elekanya, a hu na tshiñwe tshithu-vho tshine ni nga tshi elekanya, tshine na takalela u tshi ita, fhedzi tshine luthihi nga murahu ha tshifhinganyana na neta u tshi ita. Charlie, ndi a humbulela nne na inwi ro zwima zwisindi u fhira tshiñwe tshithu-vho tshine ra takalela u tshi ita, nga ndila yeneyo, fhedzi, ni a ḫivha, ni a neta nga u tshi ita.

<sup>11</sup> Huno ndi—ndi takalela u—u tshimbila, nda dzhena dzithavhani huno nda sokou tshimbila. Fhedzi ndi a neta, tshiñwe tshifhinga, na ḥoda u ita tshiñwe tshithu-vho.

<sup>12</sup> Huno ndi takalela u reila. Tshiñwe tshifhinga ndi pfa ndi tshi nga ndo neta na u ṭahala, na vhutaledzi vhu tshi dina. Ndi do sokou fhufhela modoroni wanga huno nda awela, huno nda fara tshiterini, ndi tshi tsa nga bada, ndi tshi khou imba, “Ndo takala nga maanda uri ndi kona uri ndi muñwe wavho,” kana tshiñwe tshithu. Ndo tou faresa iļo linga, huno ndi tshi khou imba, na u rwisa mulenzhe wanga na fhasi, nahone ndi tshi khou ṭavha mukosi. Huno, zwo ralo, nga murahu ha tshifhinganyana, ndi a neta, huno zwenezwo ndi humela murahu hayani huno nda thoma tshiñwe tshithu-vho.

<sup>13</sup> Fhedzi musi ri tshi ya u rerela Mudzimu kha uyo Muvhuso muswa, hu nga si vhe na tshifhinga tsha u neta na kathihi, fhedzi—fhedzi hu do vha na phatutshedzo tshifhinga tshothe, ha sokou vha nga u ralo na nga u ralo. Fhedzi, a hu na zwiñwe, ri do shandukiswa nga itsho tshifhinga. A ri nga fani na zwine ra vha zwone zwino. Ri do vha vho fhambanaho, zwivhumbwa zwo fhambanaho u fhira zwine ra vha zwone nga tshino tshifhinga. Ngauralo, ro takala.

<sup>14</sup> Ndo vha ndi tshi khou tou elekanya. A thi ḫivhi uri kana ndo vhuya nda ita, nda redza izwi kana hai. Mukomana

Charlie, tshiñwe tshifhinga tsho fhiraho, ndo vha ndi ngei Kentucky nae, huno a ri, “Mukomana Branham, ni a elekanya, uri kha Nwahagidi, inwi na nñe ri ḋo zwima zwisindi?”

Nda ri, “A thi elekanyi nga u ralo, Charlie.”

<sup>15</sup> Ha pfi, “Ndi zwone, ro hu takalela nga maanda,” ha pfi, “ni—ni elekanya zwauri ri ḋo ralo musi ri tshi dzhena kha Nwahagidi?”

Nda ri, “Hai, a hu nga vhi na tshi no vhulawa kha Nwahagidi.”

Huno a ri, “Musi, ro tou hu takalela.”

<sup>16</sup> Nda ri, “Charlie, mini-ha arali ndi tshi nga ita uri ni tende zwauri nga tshiñwe tshifhinga no vha ni nguluvhe, huno na aluwa na vha tshi tshilaho tsha nthanyana, na vha muthu? Naa ni nga vhuya na ya, na ḫoda u vhuyelela murahu na diphina nga midifho ya nguluvhe?”

Ha pfi, “Hai.”

<sup>17</sup> Nda ri, “Ni a vhona, ni ḋo vha wa ntha nga maanda u fhira nguluvhe, zwino, ni muthu, ni nga si ḫode u dovhā na vha nguluvhe.” Nda ri, “Zwino andisani izwo nga zwigidi zwa fumi, huno izwo ndi zwine na ḋo vha zwone musi ni tshi shandukiswa u bva hafha u ya kha zwine na ḋo vha zwone. Ni nga si tsha ḫoda u vha muthu hafhu na kathihi.”

<sup>18</sup> Izwo ndi zwone. Hu ḋo vha tshiñwe tshithu tsho fhambanaho. Ndo takala nga maanda nga mihibulo yaho fhedzi, ndi tshi ḫivha zwauri linwe duvha ri ḋo gonya nthanyana.

<sup>19</sup> Zwo ralo, zwino, arali Murena a tshi funa, Swondaha i tevhelaho, ine ya do vha nga ha... Zwenezwo ndi khou yo tuwa, u ya nn̄da nda dzhena Wyoming, na khonani yavhuđi; kana nn̄da nda dzhena Idaho, na khonani yanga yavhuđi, Mukomana Miner Arganbright, Mukomana Clayt Sonmore, Vhanna Vha Bindu Vha Vhakriste.

<sup>20</sup> Vhege i daho, vhege ya phanda ha i daho, ndi zwino; nga la 7, ndi tea u vha ngei—ngei Dallas, Texas, kha Khuvhangano ya Ipfi la Phodzo. Huno vhusiku ha u amba hanga ndi ha la 7. Huno zwenezwo ndi a vhuya murahu, uri ndi fhirele Idaho na Mukomana Arganbright na Vhanna Vha Bindu Vha Vhakriste. Huno khamusi ra vha na vhusiku vhuthihi Minneapolis, ri sa athu tuwa. Huno ha mbo vha na vhuragane vhuthihi ha Vhanna Vha Bindu Vha Vhakriste.

<sup>21</sup> Murena a tshi funa, Swondaha i tevhelaho nga matsheloni ndi ḫodou vhuya fhano thaberakeleni hafhu, huno arali izwo zwi tshi tendelwa huno zwa vha lufuno lwa Murena. Huno ndi ḫodou amba nga ha thoho i no ri *Tshidumbumukwe Muyani*, arali Murena a tshi funa. Yo vhonala i mbiluni yanga, vhege yothe.

<sup>22</sup> Huno nga mariwe matsheloni, nga u t̄avhanya vhukuma, i tshi todou rwa awara ya vhuna nthā ha tshithoma nga matsheloni, nda karuwa huno nda wana uyu muhumbulo, “Ilo ḫuvha kha Khalivari.” Huno ndi todou amba nga hawo, matsheloni ano: *Ilo ḫuvha Kha Khalivari*.

<sup>23</sup> Huno zwino u itela u vhala uhu, kha ri vule zwino kha Bivhili dzashu, Luñwaloni, kha Mafhungo-madifha a Mateo Mukhethwa, kha ndima ya 27. Huno ri do thoma nga ndimana ya 27 huno ra vhala tshipida tsha ulu Luñwalo, u wana zwashu zwa murahu, zwenezwo ri do thoma nga u t̄avhanya. Huno nga murahu ha tshumelo ya u rera, zwenezwo ri khou yo vha na thabelo ya vhalwadze.

<sup>24</sup> Huno, oo, tshee ha vha na tshifhinga tsho fhiraho fhano, u vhuisa fhedzi, na u nea mushumo wanga wa lushaka luswa pañeroni. Ndo vha na v̄hutanzi ho vhuyaho ho engedzeaho vhu bvaho kha uña muñangano u fhira vhune nda vha naho kha muñwe lwa tshifhinga tshilapfu.

<sup>25</sup> Hu na tshiñwe tshithu malugana, na uri ni fanela u kwama muthu, hu sa londwi uri zwi re nga nthā ha mupo zwi sumbedzwaho ndi zwingafhani. Fhedzi, ni a vhona, phodzo i tea u vha kha lutendo lwa muthu. Zwino, arali muthu a na lutendo...

<sup>26</sup> Huno vha a vhona, vhunga, Muya Mukhethwa u tshi ya kha vhathetshelesi huno wa ri, “Zwithu zwikenenene zwo bvelela. Na, uri, ni dzina likenenene. Huno ni bva fhethu ho raloho. Na tshiñwe tshithu tshe na ita. Huno zwi do vha nga *heyi* ndila.” Huno na vhona zwoñe zwi tshi bvelela nga heyo ndila!

<sup>27</sup> Naho zwo ralo, muthu, o dzula heneffo, u tea u sedza nthā huno a ri, “Uyo u tea u vha Mudzimu. Ndi t̄anganedza phodzo yanga.”

<sup>28</sup> Fhedzi, vhudzuloni ha hezwo, muthu u ri, “Vheani zwanda kha nñe huno ni nthabelele, ngauralo ndi do fhola.” Fhedzi iyo ndi ndila ine ra funzwa fhano kha la Amerika, huno, ngauralo, u tenda hezwo. Huno izwo zwa vhukuma ndi zwa Luñwalo.

<sup>29</sup> Fhedzi zwino ri wana, kha la Afurika na mafhethu o fhambanaho, edzonu litsha tshiñwe tshithu tsho raloho tshi tshi bvelela, vhathetshelesi vhoñe vha swika ngei nthā nga tshifhinga tshithihi, vha t̄anganedza phodzo yavho, ngauri vha songo funzwa tshithu. Ni a vhona? A vho ngo vhuya vha funzwa phodzo. Huno zwenezwo musi vha tshi vhona hezwo, vha a ñivha zwauri hu na Mudzimu a tshilaho. “Huno arali A tshi tshila, U—U muhulwane, nahone U—U a fhodza.” Huno izwo ndi zwone, ngauri theo yo no di vhwewa, miteo, uri U mufhodzi, huno u fhodza vhatthu. Zwenezwo musi vha tshi vhona Vhuhone Hawe vhu tshi shuma nga kha Tshivhidzo Tshawe, zwenezwo vha ri, “Izwo zwi a li ladza. Ndi zwenezwo fhedzi zwine ra ḫoda.”

<sup>30</sup> Fhedzi ro funzwa, “u vhea zwanda kha vhalwadze,” na zwithu zwo raloho. Izwo ndi ngazwo zwi sa shumi zwavhuđi nga maanda kha ja Amerika.

<sup>31</sup> Zwino, elelwani, nga matsheloni a Swondaha i tevhelaho, Murena a tshi funa, Murathu Neville u do zwi divhadza, a hu na zwiňwe. Huno ndi *Tshidumbumukwe Muyani*.

<sup>32</sup> Zwino, ndo vha ndi tshi khou ni nea tshifhinga tshițuku tsha u vula Maňwalo aňu, kha Mateo 27. Kha ri thome u vhala kha ndi—ndimana ya 27, ya Mafhungo-madifha a Mateo Mukhethwa. Zwino kha ri thetshelese zwavhuđi kha u vhalwa.

Huno maswole a muvhusi a dzhia Yesu a mu džhenisa holoni ya khaňhulo, huno gomane yoňhe ya maswole ya mu kuvhanganelo.

*Huno vha mu bvula, huno vha mu ambadza nguvho ya madzanga.*

*Huno musi vho no luka khare ya mipfa, vha i vhea kha thoho yawe, na lučanga kha tshawe...tshanda: huno vha gwadama phanda hawe, nahone vha mu goda, vha tshi ri, Ri a losha, Khosi ya Vhayuda!*

*Huno vha mu pfela mare, huno vha dzhia lučanga, huno vha mu rwa kha thoho.*

...nga murahu ha musi vho no mu goda, vha mu bvula nguvho, huno vha mu ambadza tshiambaro tshawe, huno vha mu ranga phanda u yo mu vhamba.

*Huno vha tshi bva, vha wana munna wa Kirene, ane dzina a pfi Simoni: ene vha mu kombetshedza u hwala tshifhambano tshawe.*

*Huno musi vho no ya nňha, vho no ya fhethu hu no pfi Golgotha, zwine zwa amba, fhethu ha dethele,*

*Vha mu nea viniga uri a nwe yo tanganywaho na tshavhutungu:...musi o no zwi thetshela, a sa nwe.*

*Huno vha mu vhamba, huno vha kovha zwiambaro zwawe, nahone vha ita madeňwa: uri zwi khunyelele zve zwa ambiwa nga muporofita, Vho kovha zwiambaro zwanga vhukati havho, huno khanzu yanga vho i itela madeňwa.*

...vha dzula fhasi vha mu linda henefho;

*Huno vha vhea...nga nňha ha thoho yawe hone vhupomokwa ho nwalwaho, UYU NDI YESU KHOSI YA VHAYUDA.*

*Zwenezwo ho vha hu na mavemu mavhili o vhambwaho nae, liňwe li kha tshanda tshauļa, huno liňwe li kha tshamonde.*

*Huno vhe—vhe vha fhira heneffo vha mu sema, vha tshi dzungudza Ქohoho dzavho,*

*Huno vha tshi ri, Iwe we wa tshinyadza thembele, huno wa i fhata nga maduvha mararu, ditshidze. Arali u Murwa wa Mudzimu, itsa tshifhambanoni.*

*Ngauralo na vhotshifhe vhahulu vha tshi mu goda, vhe na vha manwalo na vhahulwane, vha ri,*

*O tshidza vhañwe; ha koni u ditshidza. Arali a Khosi ya Israele, i ri ni zwino a tse tshifhambanoni, huno ri do mu tenda.*

*O vha a tshi fulufhela Mudzimu; i ri ni a mu lamulele zwino, arali a tshi do mu tshidza: ngauri o ri, Ndi Murwa wa Mudzimu.*

*Mavemu na one, e a vha o vhambiwa nae, vha mu semela mañø avho, mañoni awe.*

*Zwino u bva nga awara ya rathi ha vha na swiswi kha shango lothe u swika nga awara ya tahe.*

*Huno i tshi Ქodou rwa awara ya tahe Yesu a vhidzelela nga ipfi lìhulu, a ri, Eli, Eli, lama sabachthani? izwo zwi amba, Mudzimu wanga, Mudzimu wanga, ndi ngani iwe wo ntutshela?*

*Vhañwe vha vhe vha vha vho ima heneffo, musi vha tshi pfa izwo, vha ri, Uyu munna u vhidza Eliasi.*

*Huno muñwe nga u Ქavhanya... a gidima, huno a dzhia tshiponnzhi, huno a tshi lovhea vinigani, huno a tshi Ქoma kha luñanga, huno a mu ñea uri a nwe.*

*Vhañwe vha ri, Litshani, kha ri vhone arali Eliasi a tshi do da nahone a mu tshidza.*

*Yesu, musi o no vhidzelela hafhu nga ipfi lìhulu, a nekedza muya.*

*Huno, vhonani, lupila lwa thembele lwa kheruwa nga vhukati u bva n̄ha u swika fhasi; huno lìfhasi la dzinginyea, matombo a fhanduwa;*

*...zwalo zwa vulea; huno mivhili minzhi ya vhakhethwa vho edelaho ya vuwa,*

*Huno vha bva tshaloni nga murahu ha mvuwo yawe, huno vha dzhena mudini mukhethwa, nahone vha vhonwa nga vhanzhi.*

*Zwino musi nduna, na vhe vha vhe nayo, vha tshi linda Yesu, vha tshi vhona mudzinginyo, na izwo zwithu zwo itwaho, vha ofha zwiñhulu, vha ri, Ngoho uyu o vha e Murwa wa Mudzimu.*

<sup>33</sup> Kha ri kotamise zwifhañwo zwashu lwa tshifhinganyana uri ri ite thabelo.

<sup>34</sup> Murena, ri a ðivha zwauri Iwe u Mudzimu. Huno zwi... Nga murahu ha u vhala iñ Ipfi lo khetheaho nahone likhethwa, ri kha ñi kona u vhonä uri kudzulele Kwau a ku athu shanduka. U Mudzimu tshifhinga tshoþhe. Huno ho vhonala hu tshi nga uyo Yesu o vha a sa khou yo vha na thuso iñwe-vho, uri O dzhiwa nga zwanda zwivhi huno a tshetshekanywa a bva zwipida, huno a pfelwa mare, a goðiwa, nahone o nembelela kha tshifhambano, a tshi khou bva malofha, a tshi khou fa. Huno ho vhonala hu tshi nga a hu na thuso, na fhethu na huthihi, u swika A tshi vhuya a vhidzelela, Ene muñe, "Mudzimu Wanga, Mudzimu Wanga, ndi ngani Wo Ntutshela?"

<sup>35</sup> Fhedzi, U ita nga tshifhinga tshine hu si vhe na tshiñwe-vho tshine tshi nga ita. Ri ñewa u ðivha, Murena, zwauri arali ri na miñwe milambo-vho ine ri si kone u i pfuka, arali ri na dziñwe thavha-vho dzine ri si kone u fhira khadzo, Mudzimu ndi makone kha u ita zwithu zwine vhanwe vha si kone u zwi ita.

<sup>36</sup> U mugudeleli, kha mushumo, ngauri Wo ðivha tshiitisi tsha ïlo ðuvha kha Khalivari. Iwe, u Mudzimu, Uyo a si na magumo, wo ðivha uri ino awara i fanela u ða. Fhedzi musi yo no khunyelela, zwenezwo Wo sumbedza uri Wo vha u Mudzimu. Wo sumbedza uri vhasa ho vha hu Nnyi. Wo dzinginyisa lifhasi, huno vhakhethwa vho edelaho mavuni vha bva. Wo swifhadza ðuvha ha vha vhusiku, vhunga swiswi la vhusiku, u tshi sumbedza uri Wo vha u Mudzimu. Fhedzi Wo vhonala wo fhumula lwa tshifhinga tshilapfu nga maanda.

<sup>37</sup> Kha ri, swike kha aya mathaphuwo, nga hezwi, zwauri, musi ri tshi khou ñi tshimbila Muyani, ri tshi dededzwa nga tshanda tsha Mudzimu, hu sa londwi tshine tsha vhonala tsho khakhea, naho zwe ralo ro livhana na Khalivari; Mudzimu u ðo amba nga awara i re yone, nga tshifhinga tshi re tshone.

<sup>38</sup> Zwino, Khotsi Mudzimu, ri ðo humbela khangwelo ya zwivhi zwashu na phambuwo dzashu. Ri ðo humbela Muya Wau uri u ri dededze. Ri range phanda, vhunga Liivha lo ranga phanda Ngwana. Kha ri vhe vha thetshelesaho tshiñwe na tshiñwe tshine tshi nga ñi ri wela, ri tshi ðivha hezwi, zwauri Mudzimu u shuma zwithu zweþhe zwavhuði, huno ra ðivha zwauri zwi ðo luga.

<sup>39</sup> Ivha na riñe namusi kha iyi tshumelo. Ri rabela uri U ðo tshidza avho vha ðe kha nyimele ya u tshidzwa, huno vha tshi khou ðoda tshidzo. Dadza avho Vhutshilo Vhu Sa Fheli, vha no ðoda ho raloho. Ri rabela uri U ðo fhodza avho vha no lwala na u thuphea, vhe vha ða, vha tshi ðoda phodzo. Huno ri ðo U renda ngazwo. Ri zwi humbela nga Dzina la Murwa Wau, Mutshidzi washu, Yesu Kristo. Amene.

<sup>40</sup> Zwino, kha u amba matsheloni ano, ri tama u ðisa ngelekanyo yanu kha liñwalwa le nda li nangela u amba zwi bvaho khalo: *Ilo ðuvha Kha Khalivari*.

<sup>41</sup> Li vhonala li tshi nga li do vha nn̄da ha khalañwaha zwiñku; ili li tea u vha nga Lavhuñanu Lávhudi. Khalivari i tea u elelwa ñuvha liñwe na liñwe. Huno ro no pfa zwinzhi nga maanda nga hayo, ro vhala zwinzhi nga maanda nga hayo. Vhareri vho no rera nga hayo, u bva tshee tshifhinga tsha thoma. Vhaimbi vho no imba nga hayo, kha zwikhathi. Vhaporofita vho i bula, miñwaha ya zwigidi zwiñga i sa athu vhuya ya bvelela. Huno vhaporofita vha lino ñuvha vha sumba murahu kha musi yo no bvelela. Ndi ñuvha la ndeme nga maanda! Ndi liñwe la maðuvha a ndeme nga maandesa la maðuvha oþee e Mudzimu a vhuya a a tshisa kha liphasi.

<sup>42</sup> Huno arali i ya ndeme nga maanda kha lushaka lwa vhathu, Khalivari, ndi elekanya uri ndi zwavhudí kha riñe u ya murahu huno ra i ñola, huno ra vhona fhedzi uri i ambanu kha riñe. Ngauri, ndi na ngoho, kha ino awara ya madekwana ine ra tshila khayo, ri khou ñoda ndeme iñwe na iñwe ya Mudzimu ine ri nga i ñivha. Huno zweþhe zwine ri nga zwi wanulusa, ri fhano u guda nga hazwo, u vhona zwine zwa vha zwashu, na zwe Mudzimu a ri itela zwone, huno ra vhona zwe A fulufhedzisa u ri itela. Huno izwo ndi zwone zwine ra ñela zwone tshivhidzoni. Izwo ndi ngazwo mureri a tshi rera, izwo ndi ngazwo a tshi guda nahone a elekanya nga ha Luñwalo, huno a ñoda u hevhedzwa, ndi ngauri ndi mushumeli wa vhathu kha vhathu vha Mudzimu. Huno u khou lingedza u wana tshiñwe tshithu tshi no ño...tshine Mudzimu a ño tea u tshi amba kha vhathu Vhawe, tshiñwe tshithu tshine tsha ño vha thusa. Khamusi, tshi nga ñi, vha hañula zwivhini zwavho, fhedzi tsha vha thuso ya u vha vusa, uri vha kone u tutshela zwivhi zwavho huno zwenezwo vha vutshela u shumela Murena. Na vhashumeli vha tea u ñoda hezwi zwithu.

<sup>43</sup> Huno ili ñuvha, li la ndeme nga maanda, liñwe la maðuvha mahulwanesa, kha ri sedze zwithu zwiraru zwo fhambanaho zwe ilo ñuvha la amba kha riñe. Ro vha ri tshi nga dzhia zwa maðana. Fhedzi, matsheloni ano, ndo tou nanga zwithu zwiraru zwo fhambanaho, zwi ñodeaho zwine ra ñodou zwi sedza, lwa zwifhinganyana zwi tevhelaho zwi si gathi, zwe Khalivari ya amba zwone kha riñe. Huno ndi rabela uri izwo zwi do hañula muitazwivhi muñwe na muñwe a re hone; zwi do ita uri mukhethwa muñwe na muñwe a gwadame nga magona awe; izwo zwi do ita uri muthu muñwe na muñwe a lwalaho a imisele lutendo lwawe kha Mudzimu, huno a ñuve, o fhola; muitazwivhi muñwe na muñwe, o tshidzwa; mugunei muñwe na muñwe a vhuya, huno a vha na ñhoni nga ene muñe; huno mukhethwa muñwe na muñwe, a pembele, nahone a farelele nga huswa na fulufhelo ñiswa.

<sup>44</sup> Tshithu tshithihi tshihulwane, tsha ndeme tshine Khalivari ya amba tshone kha riñe na shango, ndi, tsha uri yo dzudzanya mbudziso ya tshivhi, luthihi zwa zwo fhela.

Muthu o wanala e na mulandu wa tshivhi. Huno tshivhi tsho vha tshi tshigwevho tshe ha vha hu si na muthu we a vha a tshi nga tshi badela. Tshigwevho tsho vha tshi tshihulwane nga maanda u swika hu si na muñwe muthu-vho we a vha a tshi nga badela itsho tshigwevho. Ndi a tenda ngangoho zwauri Mudzimu o zwi ta nga heyo ndila, uri tshigwevho tshi do vha tshihulwane nga maanda lune hu sa do vha na muthu ane a nga tshi badela, u itela uri Ene a zwi ite, Ene munę. Zwino, tshigwevho tsha tshivhi tsho vha tshi lufu. Huno rothe ro bebelwa tshivhini, ra vhumbwa vhutshinyini, ra da shangoni, ri tshi amba mazwifhi. Ngauralo-ha ho vha hu si na muñwe washu we a vha o fanela, kana, a vho ngo wana na muthihi kha lifhasi we a vha o fanela.

<sup>45</sup> Huno tshivhi a tsho ngo thoma kha lifhasi. Tshivhi tsho thoma Tađulu. Lusifa o vha... Lusifa, ene diabolo, o vha e tshivhumbwa tsho hađulwaho, nga ñwambo wa vhusithetshesi hawe, a sa athu vhuya a rwa lifhasi. Tshivhi tsho thoma Tađulu, he Mudzimu a vhea Vharuňwa, na zwiñwe-vho, kha theo yeneyo i fanaho na ye A vhea vhatru khayo; ndivho, muri wa ndivho, muri wa Vhutshilo na muri wa ndivho, he muthu a vha a tshi nga vha na munango wawe. Huno musi Lusifa o newa ndango khulu, u ita munango wawe, a ḥoda tshiñwe tshithu tsha khwine kha tshe Mudzimu a vha e natsho. Izwo zwa thoma khakhathi.

<sup>46</sup> Huno ho vha hu na tshitodea tsha tshivhi. Tshitodea tsho vha tshi lufu. Lufu lwo vha lù tshigwevho. Huno, izwo ndi uri, ro vha ri tshi nga dzhena kha zwidodombedzwa zwiñhulwane zwa holu, ngauri a thi tendi uri hu na lufu nga nnda ha luthihi fhedzi lini. Hu na Vhutshilo vhuthihi. Huno ndi tenda uri muthu ane a vha na Vhutshilo Vhu Sa Fheli a nga si fe na kathihi. Huno ndi tenda uri hu na tshinyadzo tshothe ya uyo maya u no tshinya, ngauri Bivhili yo ri, "Muya u no tshinya, u do fa ngangoho." Hu si ni muthu; "muya u no tshinya." Ngauralo, Sathane u fanela u fa ngangoho, u tshinyadziwa tshothe. Nga ndila ine nda sa tendelane na vhakhethwa vha lifhasi lothe vha no amba uri Sathane u do tshidzw! O tshinya, huno ndi ene muthomi wa tshivhi. Huno maya wawe wo tshinya; huno o vha e maya. Uyo maya u do tshinyadziwa tshothe, uri hu si sale na tshithu tshawo.

<sup>47</sup> Huno musi tshivhi tshi tshi rwa lifhasi, murahu mathomoni, vhunga lagane la vhutswu li tshi wa li tshi bva matađuluni, tsho omisa mirado ya lifhasi tshothe-tshothe. Tsho posela tshivhumbwa tshiñwe na tshiñwe, tshi re kha lifhasi, na zweithe zwa tsiko ya Mudzimu, kha vhupuli. Muthu o vha e phasi ha vhupuli ha lufu, vhulwadze, khakhathi, matungu. Mupo wothe wo wa natsho. Tshivhi tsho vha tshi tshidzidzivhadzi tshe zwa vhukuma tsha omisa mirado ya lifhasi. Huno zwenezwo ra dzudzwa fhano, ri si na fulufhelo,

nge tshivhumbwa tshiñwe na tshiñwe kha liphasi tsha vha tshi fhasi hatsho. Huno muñwe na muñwe o bebwaho kha liphasi o vha e fhasi hatsho.

<sup>48</sup> Ngauralo, ho do tea u bva huñwe Fhethu he ha vha hu si na tshivhi. Ho kundelwa u bva kha liphasi. Muñwe washu o kundelwa u rengulula muñwe. Ho do tea u bva kha Muñwe.

<sup>49</sup> Ngauralo-ha, musi muthu a tshi limuha uri o khaukanywa na Mudzimu wawe, a vha mutendeleki. Vha tswimila. Vha lila. Vha shuma vhe na nungo. Vha tendeleka, vhukati ha dzithavha na vhukati ha dziphanga, vha tshi toða Muði une mufhañi na muieti wawo a vha e Mudzimu. Ngauri, o ñivha uri arali a vhuya a humela Vhuhoneni ha Mudzimu, o vha a tshi nga zwi amba Nae. Fhedzi ho vha hu si na ndila ya u ya murahu. U a xela. Ho ngo ñivha uri u tea u dzhia ifhio ndila, ngauralo a sokou bvela nnnda, a tshi khou tendeleka, a tshi khou lingedza u wana huñwe fhethu he a vha a tshi nga wana ndila ya u vhuyelela murahu Fhethu afho. Tshiñwe tshithu ngomu hawe tsha mu vhudza zwauri u bva fhe—Fhethu he ha vha ho fhelela. A hu na muthu fhano kha vhathetshelesi avha vha vhonalah, matsheloni ano, kana kha vhathetshelesi vha theiphi ya maginete, hune ya do ya u mona na shango, a hu na na muthihi fhano, kana huñwe fhethu, nga nnnda na ane a toða u fhelela uho.

<sup>50</sup> Inwi ni ita uri zwikolodo zwanu zwi badelwe, ni a elekanya, "Izwo zwi do li ladza." Musi no no ita uri zwikolodo zwanu zwi badelwe, zwenezwo hu na muñwe muthu a no lwala muñani wañu. Musi vhulwadze ho no fhela, zwenezwo ni na zwikolodo zwinzhi zwine na tea u zwi badela. Tshithu tsha u thoma tshine na ñivha, mavhudzi anu a vho tshena, huno zwenezwo ni toðou vhuyelela na vha muswa. Huno hu na tshiñwe tshithu tshifhinga tshothe, kanzhi, na nga ñwambo wa ilo gabelo la tshivhi. Fhedzi mbiluni yañu, ngauri ni tshi toða hezwo, zwi a sumba uri hu na U Fhelela huñwe fhethu. Huñwe fhethu, hu na tshiñwe tshithu.

<sup>51</sup> Izwo ndi ngazwo, zwifhinga zwinzhi, ñamusi, zwine muitazwivhi a vha a tshi kha di tendeleka. Musidzana wa u naka, muswa u do tunya zwipida zwa mavhudzi awe zwi nembelelaho, uri a takalelw; a pennda tshifhantuwo tshawe, u ita uri a vhonale o naka; a ambara zwiambaro u sumbedza tshivhumbeo tsha vhumuthu hawe. Ngauri, ndi tshone tshithu tshi tshothe tshine a nga tshi wana, u wana huñwe fhethu u lingedza u wana tshiñwe tshithu uri tshi vhuye murahu khae, musi a tshi nga ita uri vhanna vha mu lidzele khombole, vha mu tañaise, vha mu ambise. Muthannga u do ita zwenezwo zwithihi kha musadzi, a lingedza u ñiita a kungaho khae. Vhadzulatsini vha do fhata nndu, huno vha i lugisa nga iñwe ndila, ngauri i do vhonala i ya khwine zwiñku u fhira fhethu ha mudzulatsini wavho. Zwo ralo tshifhinga tshothe, ri toða

tshiñwe tshithu, huno tshiñwe tshithu tshi dzulela u tshimbila nga n̄ha hatsho zwiñuku. Mufumakadzi muswa u ño wana uri muñwe mufumakadži muswa u takalelwa lwo engedzeaho u fhira ene. Mudzulatsini u ño wana nn̄u i no vhonala i khwine kha yawe. Musadzi u ño wana muñwe musadzi o ambara nga inwe ndila, a no vhonala e khwine khae.

<sup>52</sup> Ndi tshiñwe tshithu ngomu hashu, tshi no khou ḥoda tshiñwe tshithu, huno tshi sumba uri ro xela. Ri ḥodou wana itsho tshiñwe tshithu tshi no ño ri disa kha iyo pfusho, tshi no ño ḥadza afho fhethu ha ndala ngomu henehfo, fhedzi hu vhonala hu tshi nga ri nga si tshi wane. Vhathu vho zwi lingedza kha zwikhathi. Vho zwi tswimilela. Vha lila. Vho ita tshiñwe na tshiñwe tshe vha ñivha uri tshi itwa hani, fhedzi nahoh zwo ralo a vho ngo tshi wana, vha tshi tendeleka na shango.

<sup>53</sup> Mafhedziseloni, liñwe ñuvha, ilo ndi ilo ñuvha la Khalivari, ho vha na Muthihi we a tsa a tshi bva Vhugalani. Muthihi, a re na Dzina la Yesu Kristo, Murwa wa Mudzimu, We a ña a tshi bva Vhugalani, huno Khalivari ya vhumbwa. Ilo lo vha ñuvha le mutengo wa badelwa, huno mbudziso ya tshivhi ya dzudzanywa lwa lini na lini. Huno lo vula ndila ya u ya kha itshi tshithu tshine ra vha na ndala na ñora latsho. Lo disa fhethu ha pfusho. A hu na muthu we a vhuya a dalela Khalivari, huno a hu vhonana nga ndila ye ha vha hu ngayo, ane a nga vhuya a vha e a fanaho. Tshiñwe na tshiñwe tshe a vhuya a tshi tama kana a tshi ūlutshelwa, hu ḥanganwa natsho, musi a tshi swika afho fhethu.

<sup>54</sup> Lo vha li ñuvha la ndeme nga maanda, nahone tshithu tsha ndeme nga maanda, lo dzinginyisa shango. Lo dzinginyisa shango, vhunga lo vha li sa athu dzinginyiswa. Musi Yesu o no fa ngei Khalivari huno a badela mbudziso ya tshivhi, ili shango la tshivhi lo vha na u swifhala. Ñuvha lo kovhela masiari tshivhangalala, lo vha na u edela ha vhuñaledzi. Huno matombo a dzinginyea, thavha dla fhanduwa, huno mivhili yo faho ya bva tshaloni.

<sup>55</sup> Naa lo itani? Mudzimu o isa tshenzhemo yawe, kha Khalivari. A hvihadza iyo phukha, i no pfi Sathane, lwa lini na lini. Zwino o no halifha lwo no engedzeaho u bva tsheetsho, ngauri lo disa Tshedza kha lushaka lwa muthu. Huno nnyi na nnyi u a ñivha zwauri phukha yo hvuhalaho i ya halifhesa, i tshi kokovha u mona hothe muñodo wayo wo vundea. Zwino, Sathane o kundwa, ngei Khalivari. Liphasi lo sumbedza uri o ralo.

<sup>56</sup> Mutengo muhulwanesa we wa vhuya wa badelwa, na Muthihi fhedzi we a kona u u badela, o ña huno a zwi ita Khalivari. Afho ndi he mutengo muhulwane wa badelwa. Itsho ndi tshiñwe tsha zwithu. Mudzimu o tshi ḥoda. A hu na muthu we a vha o fanela. A hu na muthu we a vha a tshi kona. A hu na muthu we a kona u zwi ita. Huno Mudzimu a ña, Ene muñ,

huno a itwa muthu, huno a tshila vhutshilo ha muthu, fhasi ha lutamo lwa muthu, huno a vhambiwa ngei Khalivari. Huno henengei, musi Sathane o elekanya uri Ha nga zwi iti, Ha nga fhiri khazwo, O fhira nga Getsemane na mulingo muñwe na muñwe we muthu ufhio a vhuya a u imela. O fhira khawo u tou fana na vhathe vhothe, fhedzi A badela mutengo.

<sup>57</sup> Huno izwo ndi zwe zwa swifhadza lifhasi. Zwo vha zwi tshi nga tshidzidzivhadzi, hu tshi itelwa muaro. Musi dokotela a tshi nea muthu tshidzidzivhadzi, u thoma a mu ededza, a sa athu zwi ita. Huno musi Mudzimu o nea Tshivhidzo mu—muaro, shango lo wana tshidzidzivhadzi, mupo wa vha na musho. A zwi mangadzi! Mudzimu, e namani ya muthu, o vha a tshi khou fa. Yo vha i awara ye shango la vha li tshi i ḥoda, naho zwo ralo vhanzhi vhavho a vho ngo i ḥivha.

<sup>58</sup> Vhunga zwo ralo namusi, vhanzhi vho ḥoda hezwi zwithu, huno naho zwo ralo a vha zwi limuwi. A vha limuhi ndila ya u bva. Vha kha di lingedza u ḥoda midifho na zwithu zwa shango, vha tshi khou lingedza u wana ndila yavho ya u bva.

<sup>59</sup> Ho vha hu na, zwisumbandila zwinzhi zwe zwa sumba kha ilo ḫuvha, tsumbo khulwane dza zwi ḫaho. Zwo no sumbedzwa nga ngwana zwi sa athu da, nga mbohwana, nga tshiivha, na hezwi zwithu zweithe, fhedzi naho zwo ralo zwo kundelwa u hu vunda. Zwo kundelwa u vunda uho u farwa nga lufu, he Sathane a vha e na lifhasi.

<sup>60</sup> Matombo eneo e a vhuya a tshimbila khao, nthia na fhasi kha lifhasi, tsevhela dzi dugaho! Lusifa o vha e murwa wa nga matsheloni, huno o tshimbila kha lifhasi musi lo vha li thavhandubi i dugaho. Ayo matombo eneo mathihi e a vha o no fhola, musi Yesu o no fa ngei Khalivari, a bodelwa nn̄da ha lifhasi.

<sup>61</sup> Mutengo we wa badelwa, na vhupuli ha Sathane ha vundiwa. Mudzimu a humisela zwandani zwa muthu, ndila ya u vhuyelela kha zwe a vha a tshi zwi ḥoda. O do tea u sa tsha tswimila. O rwa, musi A tshi vunda mutodo wa Sathane, henengei Khalivari, mutodo wa tshivhi, wa vhulwadze! Huno zwi disa muthu muñwe na muñwe a no fa, kha lifhasi, murahu ngomu Vhuhoneni ha Mudzimu, na zwivhi zwo hangwelwaho. Haleluya! Zwivhi washu zwo hangwelwa. Sathane ha tsha do ri thivhela kha Mudzimu lini.

<sup>62</sup> Hu na gondo lo itwaho. Hu na luñingo lwo dzulaho heneffho. Hu na laini ya u ya Vhugalani, i disa muthu muñwe na muñwe hune a nga swikelela iyo laini. Arali muthu o ḫala tshivhi, yo mu t̄umekanya na vhukati. A nga hangwelwa itsho tshivhi. Hu si izwo fhedzi, fhedzi itsho tshivhi tsho badelelwa. Oo! A ni tei u ri, “A tho ngo fanela.” Ngoho, a no ngo ralo, na kathihi ni nga si vhe nga u ralo. Fhedzi Muthihi o fanelaho o dzhia fhethu hañu. No vhofholowa. A ni tsha tea u tendeleka lini. A ni tei u vha mudzia-u-ḥoda-midifho nn̄da hangeno kha lifhasi.

Ngauri hu na tshisima tsho ḫalaho Malofha,  
 A bvaho tsingani dza Imanuele,  
 He vhaitazwivhi vha fhufhela fhasi ha  
 mudalo,  
 Vha xedza dondo ḥa mulandu wavho.

<sup>63</sup> A ni tei u xela. Hu na gondo, na Ndila, nahone i pfi Ndila ya vhukhethwa. Vha songo kunaho a vha fhiri khayo. Ngauri, u da nga tshisimani, u thoma, huno zwenezwo a dzhena gondoni.

<sup>64</sup> O vunda maanda a Sathane. A vula miñango ya dzhele ya vhudzulavhafu, kha muthu muñwe na muñwe we a vha o valelwa, kha ili liphasi, kha dzidzhele, a tshi ofha uri musi o fa, lufu lu ḫo vha mini khae. Kha Khalivari, O vula ayo mahothi a sele, a tendela lithubwa liñwe na liñwe u ṭuwa ḫo vhofholowa. A ni tei u ṭwa ni tshi kherukanywa nga tshivhi. A ni tei u ṭwa ni tshi kumedza mirado yanu kha tshivhi, ni tshi nwa, ni tshi daha, ni tshi gembula, ni tshi amba mazwifhi. Ni nga vha a fulufhedzeaho, o lugaho, nahone a si na vhufhura. Huno Sathane a nga si ite tshithu ngazwo, ngauri no fara laini, laini ya Vhutshilo yo gimiwaho kha Tombo ḥa Zwikhathi. A hu na tshire tshi nga ni dzinginyisa Khało. A hu na mimuya ine i nga ni dzinginyisa Khało. A hu na tshithu, na lufu lwone lune, lu nga si ri fhandekanye na lufuno lwa Mudzimu lune lwa vha kha Kristo Yesu. Izwo ndi zwe Khalivari ya amba zwone.

<sup>65</sup> Vhatu vhe vha vha vhe vhupulini vho vhofholowa. Vhatu vhe vha vhuya vha vha fhasi ha nyofho dza lufu vha nga si tsha ṭwa vha tshi ofha lufu. Muthu a no tulutshelwa Muđi, une muftati na muiji wawo, Mudzimu, a nga kanda kha gondo, huno a sedzisa tshifhaṭuwo tshawe Tađulu, ngauri o vhofholowa. Haleļuya! O renguļulwa. Ha tsha tea u ṭwa a tshi tendeleka, ngauri hu na ndila ya u divha uri kana no luga kana hai. Mudzimu u ri nea Vhutshilo. Zwigvi zwashu zwo ṭuwa. Ilō duvha ngei Khalivari ḫo badela mutengo. Musi ri tshi vhona hezwo zwothe, a zwi mangadzi murendi o īwala:

Vhukati ha matombo a fhanduwaho na  
 lutombo lu swifhalaho  
 Mutshidzi wanga o kotamisa tshifhaṭuwo  
 Tshawe huno a fa.  
 Lupila lu vuleaho lwo dzumbulula Ndila  
 Ya u ya madakaloni a Tađulu na ḫuvha li sa  
 pheli.

<sup>66</sup> Abrahamu ha tei u ṭwa a tshi tendeleka, kha shango ḫothe, a tshi ḫoda muđi. Muitazwivhi ha tsha tea u ṭwa a tshi mangala, uri kana a nga tshidzwa kana hai. Muthu a lwalaho ha tei u mangala uri kana a nga fhodzwa kana hai. Lupila lu vuleaho, nga ilō duvha ngei Khalivari, lwo dzumbulula Ndila ya u ya kha gundo ḫothe. Mudzimu u ri nea maanda a Muya Wawe, u tshila ri tshi kunda izwi zwithu zwothe; u ri humbelu u zwi

tenda fhedzi. Izwo zwe bvelela nga ilo duvha ngei Khalivari. A hu athu vha na duvha li no nga lone na kathihi. A hu nga vhi na li no nga lone na kathihi. A li tsha todea. Mutengo wo badelwa, huno ro rengululwa. Ndivhuwo kha Mudzimu! Ro rengululwa. A hu tshe na tshine na tea u tshi mangala. A hu tshe na u tshi humbulela. Zwothe zwe twiswa. Lupila lwo kokodzela xaradeni murahu, huno ro dzudzwa gondoni, uri ri si tsha twa ri tshi mangala, nga nnnda ha u tenda na u tou tshimbila ra bvela phanda. Ri tshimbila ra dzhena henehfo Vhuhoneni honoho ha Mudzimu.

<sup>67</sup> Abrahamu o divha, na vhañwe vho divha, hezwo musi vha tshi khou toda Muđi. Vho divha uri vho vha tshi bva Huñwe Fhethu. Tshiñwe tshithu tsho no bvelela. Vho vha vha tshi khou tshila kha lifhasi lo omaho mirado. Midzinginyo ya da. Madumbu a a da. Dzinndwa na mabulayo! Phele na ngwana dza lana, kana phele ya la ngwana, huno ndau i la phulu. A zwi vhonali zwe luga. Hu na tshiñwe tshithu tsho khakheaho. O divha uri ho vha hu na tshiñwe tshithu tsho khakheaho. Vhatu na mukomana vha vhulaha murathu; khotsi u vhulaha murwa, murwa u vhulaha khotsi. Hu na tshiñwe tshithu tsho khakheaho. U khou kalaha. U khou fa. U khou puta. Vhulwadze vhu khae. U vhupulini. Miri i a aluwa, fhedzi a si i sa fi. I a fa. Thavha dzi a shanduka. Malwanzhe a a oma. Mađi a a kundelwa. Hu na tshiñwe tshithu tsho khakheaho. Huno o toda fhethu, Muđi we izwo zwa si tsha bvelela. O divha, arali o vha a tshi nga vhuyelela Vhuhoneni ha Uyo we a zwi lugisa, o vha a tshi nga zwi amba Nae.

<sup>68</sup> Oo, ndi u tondwa-de nandi, muitazwivhi, hu re hone, matsheloni ano, u divha zwauri ni na Ndila zwino. Ilo duvha ngei Khalivari lo vuła ndila. Ngauri zwe avho vhomakhulukuku vhothe vha zwi zwima nahone vha zwi toda, Khalivari yo ni nea zwone, nga fhedzi. Naa ni do zwi furalela hani? Naa ni do zwi furalela hani, uri ni vhe murado wa dinomineisheni? Naa ni do zwi furalela hani, uri ni vhee tshiimela vhudzuloni hazwo, midifho ya shango? Ndi ngani ni sa zwi tanganedzi? Lupila lu vuleaho lu disa muthu henehfo murahu ngomu Vhuhoneni ha Mudzimu, a si na tshivhi khae, tsha lunwe lushaka. Huno vhu vhea bada phanda hawe, kha tshithu tshine a khou tshi toda: Tađulu, vhugala, mulalo, Vhutshilo Vhu Sa Fheli, tshiñwe na tshiñwe henehfo phanda hawe.

<sup>69</sup> Ilo duvha lo vha li dzhe-dzhenewo ja lufu kha maanda a Sathane. Lo fhedza tshiñwe na tshiñwe.

<sup>70</sup> Huno ndi kona u Mu vhaba henengei; O vha e ngwana ya Edeni, u bva kha murunzi wa u thoma wo bvaho khayo.

<sup>71</sup> Musi Abele, nga lutendo, o nekedza Mudzimu tshiñhavhelo tshavhudivhuđi u fhira Kaini. U fanela u vha o kungelela lu-lutavhi lwa mućokola u mona na mutsinga wa ngwana, a i

kokodzela kha tombo. A dzhia to—tombo nga tshanđa tshawe, sa pfumo, huno a kokodzela thoho thukhu yayo murahu, huno a i rema nahone a i tshetshekanya u swika i tshi fa. Huno wulu yayo ya tamba nga malofha ayo. Ya vhumbuluwa malofhani ayo. Ho vha hu murunzi.

<sup>72</sup> Fhedzi nga ilo ḫuvha ngei Khalivari, ho vha hu si na ngwana ya ili liphasi, fhedzi yo vha i Ngwana ya Mudzimu, ye ya vha i tshi khou fa, i tshi vhumbuluwa Malofhani A Yone inę. O tshetshekanywa, nahone a reňwa, nahone a rwiwa, nahone a pfelwa mare, nahone a sukumedzwa, nahone a maphiwa, na tshiňwe na tshiňwe, nga shango, nahone Malofha a tshi khou rotha kha zwipiđa zwe nembelelaho zwa mavhudzi Awe.

<sup>73</sup> Musi ngwana ya Abele i tshi fa, yo fa, i tshi khou amba nga luambo lwe Abele a kundelwa u lu pfectesa. Yo vha i tshi khou lila.

<sup>74</sup> Huno musi Ngwana ya Mudzimu i tshi fa ilo ḫuvha ngei Khalivari, Yo amba nga luambo lwe ha sa vhe na muthu a I pfectesaho. “Mudzimu Wanga, Mudzimu Wanga, ndi ngani Wo N̄utshela?” Yo vha i Ngwana ya Mudzimu, yo tshetshekanywaho ya bva zwipiđa, yo reňwa.

<sup>75</sup> O vha e yeneyo Ngwana ye Abele a vha e nayo ḫalukanyoni, musi o vhona Mbeu yo fulufhedziswaho ya musadzi. O vha e Ngwana ye Daniele a i vhona, ye ya dzikulwa kha thavha, hu si nga zwanda. O vha e Linga vhukati ha linga, kha muporofita. Zwothe zwe vha vha vho no zwi vhona ho tanganwa nazwo nga ilo ḫuvha, ilo ḫuvha Khalivari. Illo lo dzhenisa tshithu tshihulwane ngomu. Illo lo vunda mutodo wa Sathane.

<sup>76</sup> Tsha u thoma, ri tea u ḫoda zwe ilo ḫuvha la amba zwone. Tsha vhuvhili, ri tea u vhona zwe ilo ḫuvha la ri itela zwone, zwino, zwe la ri itela zwone. Zwino, tsha vhuraru, kha ri sedze kha zwine ra fanela u zwi itela ilo ḫuvha. Naa ri fanela u itani?

<sup>77</sup> Tsha u thoma, ri tea u sedza ngomu halo, ngauri ndi ḫuvha l̄ihulwane, l̄ihulwanesa kha maduvha othe. Mutengo wa tshivhi wo dzudzanywa. Maanda a Sathane o vundwa.

<sup>78</sup> Huno zwino ri ḫodou vhona zwine ra tea u ita sa mbuelo. Zwino, sa mbuelo, musi Yesu a tshi fa ngei Khalivari, kha Khalivari ilo ḫuvha, Ho ngo badela fhedzi mutengo wa zwivhi zwashu, fhedzi nahone O badela mutengo huno a ita ndila ya uri ri kone u Mu tevhela; ngauri riňe, sa vho-Adama vho waho vho rengululwaho. Vhunga Muya wo dededza Adamu (Adamu wa u thoma) nga Muya, we wa vha na ndango ya mupo wothe, zwenezwo riňe (Adamu wa vhuvhili), kana vhathu vha liphasi vho rengululwa nga Kristo, u bva nga ḫuvha la Khalivari, vha nga Mu tevhela. Zwino, musi A tshi fa ngei Khalivari, O ita ndila. A nekedza Muya, Muya Mukhethwa, we wa U rumela murahu kha liphasi, uri nne na inwi ri tshire ngawo. Izwo ndi zwine Khalivari ya amba zwone kha riňe, u Mu tevhela.

<sup>79</sup> Tsha u thoma, sedzani ngomu hayo, vhonani zwe ya ri itela zwone. Huno zwino ri fanela u itani maelana nayo? Naa nne na inwi ri fanela u itani?

<sup>80</sup> Zwino, riñe ri ri, “Zwo luga, ndi—ndi a zwi takalela hezwo. Izwo ndi zwavhuđi nga maanda.” Fhedzi ri tea u zwi tanganedza. Huno u zwi tanganedza, ndi u tanganedza Muthu Wawe, Kristo mbiluni yashu.

<sup>81</sup> Zwenezwo, ro vhofholowa kha tshivhi, ngauralo-ha a hu na ngeđane dza tshivhi dzi no khou nembelela kha rine, na luthihi. Mudzimu, u tou nga a ro ngo tshinya na kathihi, Tshivhavhelo tsho fhelelaho tsho ri ita vho fhelelaho. Ngauri, Yesu o ri, “Ivhani-ha vho fhelelaho, vhunga Khotsi aŋu a re Tađulu o fhelela.” Zwenezwo, a hu tshe na tshi no tea u itwa, fhedzi ri itwa vho fhelelaho Vhuhoneni ha Mudzimu.

<sup>82</sup> Zwino, henefho ndi hune ra xedza vhuimo hashu. Arali ri sa sedzesi, ri lingedza u sedza murahu kha zwe ra vha ri zwone. Huno musi ri tshi khou di sedza murahu kha zwe ra vha ri zwone, Tshivhavhelo a tshi ambi tshithu kha riñe. Oo, a ni koni u zwi vhona, tshivhidzo? [Tshivhidzo tshi ri, “Amene.”—Mudz.] A thi nga . . . a thi nga do lingedza mushumo. Ndi nga si kone, huno na inwi ni nga si kone. A hu na thodea ya u lingedza. No xela, tsha u thoma, musi ni tshi khou di sedza kha zwe na ita. Fhedzi ni songo sedza kha zwe na ita.

<sup>83</sup> Sedzani zwe ijo ḫuvha kha Khalivari ja ni itela zwone. Lo badela mutengo waňu. Lo dzudzanya mbudziso. “Zwivhi zwaňu zwi tshi nga muridili; zwo tshena sa mahada. Zwo tswuka sa luvhundi; zwo tshena sa wuļu.” Zwenezwo a ni na tshivhi. A ni na tshivhi lwo fhelelaho. A hu londwi zwe na ita, kana zwine na ita, ni kha di vha a si na tshivhi. Musi ni tshi kha di vha no tanganedza Yesu Kristo sa Mutshidzi waňu, zwivhi zwaňu zwo hangwelwa. Tshinwe na tshinwe tsho *hangwelwa* tsho “hangwelwa nahone ha hangwiwa nga hatsho.”

<sup>84</sup> Zwenezwo hu itani? Hu ni nea, nga murahu ha iyo nyimele, Muya Wawe, u Mu tevhela na u ita sa zwe A ita, u itela vhaňwe vha no khou tevhela. O vha a tshi tou vha Munna muthihi, Munna o fhelelaho. O nekedza vhatshilo Hawe, nahone A ni itela tsumbo. Zwino ri fanela u itani?

<sup>85</sup> Zwino, tshithu tsha u thoma tshine nda ḫodou tshi amba, ndi, Yesu ho ngo tshirela Ene mune na kathihi. Vhatshilo Hawe ho shumiselwa vhaňwe. Uvho, lwo fhelelaho, ndi Vhatshilo Vhu Sa Pheli. Musi ni tshi ri ni ya tshivhidzoni, huno ni tshi ita zwithu zwavhuđi, izwo ndi zwavhuđi. Fhedzi musi ni tshi tshila vhatshilo haňu kha inwi mune, a ni na Vhatshilo Vhu Sa Pheli. Vhatshilo Vhu Sa Pheli, ndi u tshirela vhaňwe. Ho zwi sumbedza musi Vhu tshi da ngomu ha Ngwana ya Mudzimu. O tshila, huno o vha e na Vhatshilo Vhu Sa Pheli, ngauri Ho

ngo tshilela Ene muñe. O tshilela vhañwe. Huno ni ḫanganedza Vhutshilo Vhu Sa Fheli, nga u ḫanganedza iło ḫuvha, huno a ni tsha tshilela inwi muñe. Ni tshilela vhañwe.

<sup>86</sup> Muñwe muthu o ri, “Ni nga ima hani, na tendela nnyi na nnyi a tshi ni vhidza madzina o raloho mavhi?” A ni ḫitshileli. Ni tshilela vhanwe, uri ni kone u rengulula uyo muthu. Vhoiñwi ni vha vharwa. Huno khakhathi yazwo ndi uri, tshivhidzo tsho no hangwa zwauri vho vha vhe vharwa. Ni murwa. Ni khou dzhia fhethu ha Kristo. Ni murwa, ngauralo ni songo tshilela inwi muñe. Tshilelani vhañwe.

<sup>87</sup> “Zwo luga, Mukomana Branham, ndi nga tshilela *uyu* mukomana, ngauri ngoho ndi munna wavhuđi.” Izwo a si zwone.

<sup>88</sup> Tshilelani uyo munna a no ni vhenga. Tshilelani uyo muthu ane a nga ni vhulaha arali a tshi nga kona. Izwo ndi zwe vha Mu ita zwone. Vho Mu vhulaha, huno A fa, uri A kone u vha tshidza. Uvho ndi Vhutshilo Vhu Sa Fheli. Musi, inwi, uvho vhu khanani yanu, no sedza Ṭadulu-ha. Fhedzi ni ḫekedzela zwithu zwanu, na zwi kovha, vhunga nngu i tshi ḫea wuļu yayo. Ni a sedza, thungo ya Khalivari.

<sup>89</sup> Ndi a fulufhela izwi zwi ni thusa u dzhena fhethu. Izwo ndi zwine thaberenakele, izwo ndi zwine vhathe vhođe, vha tea u ita, u wanulusa zwine na vha zwone, na uri ndivho ndi ifhio. Tshivhidzo, a si u ya tshivhidzoni u tou tamba muzika, u imba dzinyimbo. Tshivhidzo ndi fhethu ha khakhululo. “Khaṭhulo i thoma nduni ya Mudzimu.”

<sup>90</sup> “Ri fanelia u didzhia sa vho faho, huno vha tshilaho kha Kristo.” Zwenezwo, O ita ndila ya uri ri kone u ḫinekedzela kha tshumelo Yawe, u Mu tevhela. Arali ri tshi Mu tevhela, ri tshila vhutshilo he A tshila. Izwo zwi a mangadza.

<sup>91</sup> Yesu o amba, nahone a amba nga hazwo. Kha ndi tou ni ḫea miredzo i si gathi nga hazwo. Thetshelesani zwavhud. Zwi songo ni pfuka. Yesu o amba, nga ilo Duvha U do khethékanya vhathe, vhunga dzinngu na dzimbudzi. Huno U do ri kha dzimbudzi, “Imani thungo ya tshamonde.” Huno kha dzinngu, “Imani kha tshauļa.”

<sup>92</sup> Huno A ri kha dzimbudzi, “Tuwani kha Nne. Ngauri, Ndo vha ndi na ndala, huno a no ngo Nkanzwa. Ndo vha ndi dzhele, huno a no ngo Ntola. Ndo vha ndi fhedzi, huno a no ngo Nnyambadza. Ndo vha ndi na dora, huno a no ngo Nne a tshinwiwa. Ndo vha ndi tshi lwalā, huno a no ngo Ntola. Ngauralo, tuwani kha Nne.”

<sup>93</sup> Huno kha dzinngu, A ri, “Ndo vha ndi na ndala, huno na Nkanzwa. Ndo vha ndi fhedzi, huno na Nne a zwiambaro. Ndo vha ndi tshi lwala, huno na Ntshumela.”

<sup>94</sup> Huno dzhielani nzhele. Ni songo kundelwa u pfesesa heli, tshivhidzo. Vhulungani heli mbiluni yanu, lwa lini na lini.

Zwo itwa zwi sa ṭalukanyiwi! Vhathu a vha zwi iti ngauri hu mushumo. Muthu a no ni nea tshinwe tshithu, ngauri u fanela u zwi ita, muthu a no ni kanzwa ngauri u fanela u zwi ita, u na muhumbulo wa tseda. Hu tea u vha vhutshilo honoho hanu, nyito yeneyo yanu.

<sup>95</sup> Zwo vha zwi tshi akhamadza nga maanda kha idzi nngu, lwe dza ri, “Murena, Wo vha u na ndala lini? Huno ra sa U kanzwe... Ndi lini he Wa vha u na ndala, huno ra U kanzwa? Ndi lini he Wa vha u na dora, huno ra U nea tshinwiwa? Ndi lini he Wa vha u tshi lwala, huno ra U shumela?”

<sup>96</sup> Zwo vha zwi nga vhudiitisi nga maanda zwi tshi bva kha lufuno, Vhutshilo Hau fhedzi ho tshila khavho. Mudzimu, i ri vhathu vha vhone zwe Khalivari ya ri itela zwone, nga vhudiitisi nga maanda.

“Ndi lini he Wa vha, Murena? Na kathihi izwo a ro ngo zwi divha.”

<sup>97</sup> Sedzani zwe Yesu a rembuluwa huno a amba, “U swika heneffo he na zwi itela avha, no zwi itela Nne.”

<sup>98</sup> Vhutshilo vhu si na tseda; hu si muhumbulo wa vhuvhili. Hu si u elekanya nga hazwo; fhedzi ni o faho nga maanda kha zwithu zwa lino shango, huno na vha a tshilahlo nga maanda kha Kristo, nahone na vha a tshimbilaho nga maanda gondoni, lune izwi zwithu zwi tou vha tshithu tshi no itea nga vhudiitisi. Ni tou zwi ita. Hu si u ri, “Zwo luga, zwino, Murena u do, Murena, u ḥoda ndi tshi ita hezwo.” A si hezwo. Ni tou vha tshipida Tshawe. Muya Wawe u kha inwi, huno ni difara nga ndila ye A difara ngayo. Ah! Zwi pfecteseni.

<sup>99</sup> “Hu na ndila i vhonala yo luga kha muthu, fhedzi magumo ayo a vha ndila ya lufu.”

<sup>100</sup> “A si vhothe vha no ri, ‘Murena, Murena,’ vha no do dzhena, fhedzi avho vha no ita lufuno lwa Khotsi Anga,” zwi tshi tou bva mbiluni dzavho, vho tou vhofholowa.

<sup>101</sup> Zwino, ijo duvha ngei Khalivari lo badela uyo mutengo, uri ri kone u vha nga heyo ndila.

<sup>102</sup> Hu si u ri, “Ni a divha, tshilikadzi Jones nga tshinwe tshifhinga o vha... O vha a si na malasha, huno nda ya nda mu rengela manwe malasha. Ndi a ni vhudza, ndo vhone mukomana we a ḥoda suthu ya zwiambaro, huno nda ya nda mu wanela suthu ya zwiambaro. Fhatutshedzani Mudzimu! Nne ndi Mukriste.” Yawee, nnenne! Inwi muthu wa tseda, a shayaho, a ḥungufhadzaho. Ni muhoin.

<sup>103</sup> “Ni songo tendela tshanda tshaula u divha zwine tshamonde tsha khou ita, huno tshamonde tsha divha zwine tshaula tsha khou ita.” Nga vhudiitisi nga maanda no tou fa ni kha Kristo, u swika ni tshi zwi ita, naho zwo ralo. Ndi

kudzulele kwaṇu. Ndi kuvhumbele kwaṇu. Ni a zwi ita, naho zwo ralo. Hu tou vha Vhutshilo vhu no tshila kha inwi. No dikumedzela tshoṭhe kha uyo Muya, huno U tou ḫitshila kha inwi. Oo, ni a pfa uyo Muya wo fhaṭutshedzwaho, uvho Vhutshilo! “Hu si ni nne a no tshila,” o ralo Paulo, “fhedzi Kristo u tshila kha nne,” nga vhudiitisi nga maanḍa fhedzi.

<sup>104</sup> “Zwo ralo, ndi a ni vhudza, Mukomana Branham, riñe ri Vhakriste fhano. Ri thusa *avha* vhathu. Ri thusa *vhone* vhathu.” Yawee, nñennen! A ni shoni. Uvho a si Vhukriste.

<sup>105</sup> Vhukriste nga vhudiitisi vhu tea u tou ralo. Vhu fanela u itwa. Huno ni tou hangwa nga haho, zwoṭhe nga haho, “A thi iti.” Iyani, ni zwi ite.

<sup>106</sup> Kristo o tou kumedza tshoṭhe vhutshilo Hawe kha Mudzimu. O ḫinekedza, sa mushumeli wa vhathu, kha vhathu. O ḫekedza vhutshilo Hawe, nga fhedzi. O vha a songo tea u zwi ita. Ho ngo zwi ita a sa fushei. Ho ngo ri, “Zwino, vharathu, vhoiñwi nothe ni fanela u elekanya zwinzhi nga ha Nñe, ngauri Ndi ḫa u ni fela.” Na kathihi Ho ngo amba ipfi nga hazwo. O fa, naho zwo ralo, ngauri ho vha hu Mudzimu Khae.

<sup>107</sup> Ndi Mudzimu kha inwi, ndi Mudzimu kha nne, ane a ri ita uri ri sedze vhañwe. Dzinngu, thungo nthihi.

<sup>108</sup> Muniwe wavho u ḫo ri, “Zwo luga, Murena, ndo ita *hetshi*. Nahone, Murena, ndo ita *hetsho*.”

<sup>109</sup> A ri, “Tuwani kha Nñe, inwi vhadzia-vhutshinyi. Na kathihi A tho ngo vhuya nda ni ḫivha.”

<sup>110</sup> Arali tshivhidzo tshi tshi nga vhuya tsha da kha idzo mbuno dza ndeme, dza uri a si tshiñwe tshithu tshire na lingedza u ita, inwi na dikombetshedza u tshi ita. Ndi tshiñwe tshithu tshe tsha bebwa ngomu haṇu.

<sup>111</sup> Ni nkhangwele, khonani yanga ya Pentekoste. Nñe ndi mupentekostała. Fhedzi khonani dzanga dza Pentekoste dzo swika fhethu, hune ha tea u vha mu—muzika munzhi u ḫavhanyedzaho, u lidzwa ha dziñwe bennde, kana u vhanda zwanda, kana dzithamborini, u bveledza mukosi. Izwo ndi nyanyuwo fhedzi. Vha tambo kha dzibennde vha sa athu ya nndwani. Vha džhenisa vhathu kha nyanyuwo ya nndwa. Ndi tenda kha muzika. Ndi tenda kha u vhanda zwanda. Fhedzi ndi tenda kha hezwi zwithu. Izwo ndi ngoho kokotolo. Ri fanela u vha na hezwo.

<sup>112</sup> Fhedzi no sia zwithu zwihiwlwane zwi songo itwa, ndi hone vhutshilo ha u dikumedza sa tshiñvhahelo ha uri Mudzimu u tshila kha inwi, nga vhudiitisi ni tshi khou ita tshi re tshore ngauri tshi tshore. Ni tshi khou bvela phanda, ni sa vhuyi na elekanya tshithu nga hazwo. Ni tshi khou tou zwi tshila.

Zwenezwo sedzani, ni vhona zwi no khou itea. Inwi ni tou... a ni... Ni gondoni. Izwo ndi zwe Khalivari ya amba zwone kha inwi, gondoni, yo ni vulela ilo ḫuvha.

<sup>113</sup> Zwino, zwino elelwani, ni nga si vhe mbudzi hafu na nngu hafu. A dici nga vangani.

<sup>114</sup> Zwino, hu na vhathu vhanzhi vha no ri, “Ee, ni a ḫivha uri mini? Ri na dzangano kha tshigwada tshashu. Rine, ri thusa vhashai. Rine ri ita *hetshi*.” Izwo two luga, fhedzi ni khou lidza luñanga lwañu nga hazwo. A ni iti hezwo.

<sup>115</sup> “Ni tshi bvisa zwifhiwa ni zwi ite tshiphirini,” Yesu o ralo. Nga vhudiitisi fhedzi, tshiñwe tshithu kha inwi, a zwi fhiri u ya, u wana mađi a u nwa. Ni na ḫora. Arali muñwe muthu a na ḫora, ni a mu humbula, na ene-vho. Thodea ya muñwe muthu, ni a mu humbula u fana na zwe na vha ni tshi nga ita kha thodea yanu. Huno ni songo zwi ḫogomela. Sokounu bvela phanda na u tshila.

Zwino, ni nga si vhe hafu nngu na hafu mbudzi.

<sup>116</sup> Ngauralo arali ni tshi ri, “Zwo luga, tshivhidzo tshashu tshi na dzangano. Ri nea vhashai, huno ri ita *hetshi*, huno ra ita *hetsho*, nahone ra ita *tshinwe*.”

<sup>117</sup> Arali ni na hetsho ni si na itsyo tshiñwe, Vhutshilo ha Kristo kha inwi, zwa vhukumakuma ni khou tou zwi ita lwa fhedzi. Yesu... Paulo o ri, Vhakorinta Ya U Thoma 13, “Naho nda kovhekanya thundu dzanga dzothe u kanzwa vhashai, nahone nda tenda muvhili wanga u tshi fhiswa sa tshithavhelo, a zwi mpfarisi tshithu.”

<sup>118</sup> Zwino, heli li a kondà, fhedzi ndi Ngoho. Ni tea u da kha iyo mbuno, na limuwa zwe Khalivari ya ni itela zwone. Ri a i sedza, huno ra ri, “Oo, ee, izwo ndi zwavhuđi.” Izwo a si zwone. Arali uyo Murwa wa Mudzimu o do tea u ya Khalivari, u vhambiwa, murwa muñwe na muñwe a no da u fanela u ya Khalivari. U fanela-vho u vha na Khalivari. Ni fanela u vha na ilo ḫuvha la Khalivari. Ndi tea u vha na ilo ḫuvha la Khalivari. Ilo li dzudzanya mbudziso ya tshivhi. Hu si u khađana na mureri; kana u dzinginyiselwa tshivhidzoni; hu si u dzhena nga ledere; hu si u dzhena nga mushumo. Fhedzi u dzhena nga Mbebo. Na kathihi Ho ngo nea ledere. Na kathihi Ho ngo nea mushumo. O nea Mbebo. Iyo ndi nđila ine ra dzhena ngayo. Zwenezwo, u bva kha hezwo, nga vhudiitisi ri khou tshila vhutshilo ha Tshikriste.

<sup>119</sup> Zwino, jirwe jihumbulwa. Hafu mbudzi, hafu nngu, a vha na tshithu tsho raloho. Ni mbudzi kana nngu. A ni hafu mbudzi na hafu nngu. Ni mbudzi kana nngu.

<sup>120</sup> Zwino, arali ni tshi khou tou ita zwithu zwavhuđi, huno na elekanya uri ni nga dzhena, nga hezwo, zwenezwo ho vha hu si a tei u vha na ḫuvha la Khalivari. Mulayo wo zwi disedza

hezwo. Fhedzi, nge zwa dzhia ḫuvha la Khalivari, ho vha hu u dzhenisa hezwo, uri ri sa tou vha mirađo ya tshivhidzo, fhedzi ri vhe vharwa na vhananyana vha Mudzimu. Izwo ndi zwe ḫuvha la Khalivari la vha li zwone. Izwo ndi zwe la amba zwone kha inwi, uri ni kone u ita, huno na tevhela, nahone na difara vhunga Yesu.

<sup>121</sup> Zwino, mulambo a u eleli ntha na phasi, nga tshifhinga tshithihi. Mulambo u elela thungo nthihi fhedzi. Huno Muya wa Mudzimu u tou elela thungo nthihi. A u Divanganyi na zwithu. U elela nga ndila i fanaho.

<sup>122</sup> Sedzani Yesu, ri tshi vala. Yesu o ri, “Mishumo ine Nda ita na inwi ni do ita-vho, na mihulwane u fhira heyi ni do ita, ngauri Ndi ya ha Khotsi Anga.”

<sup>123</sup> A thi khou amba hezwi nga maanda kha tshivhidzo fhano. Ni a pfectesa. Fhedzi iyi Milaedza i a theiphiwa. Vha mahumi a zwigidi vha a i pfa, u mona na shango.

<sup>124</sup> Ndi khou yo fhindula iyo mbudziso u itela musasalandzi, zwa zwino. Ndo no ambiwa kanzhi...ndo amba. Vha ri, “Mulandu, inwi ni tenda Bivhili? Yesu o ri, ‘Iyi mishumo ine Nda ita na inwi ni do ita-vho, na mihulwane u fhira heyi ni do ita, ngauri Ndi ya ha Khotsi Anga.’”

<sup>125</sup> Naa ni nga vha muvhi hani, murena? Naa ni nga tendelekela kule zwingafhani na u vhona zwo dzumbamaho, ni na theolodzhi dza vhuçali dzanu, na muhumbulo wañu wa thalukanyo nga ha tshiñwe tshithu-vho? Khonani yanga ya tshilidzi nahone yo xelaho, naa a ni koni u pfectesa zwauri iyi Bivhili i ḫalutshedzwa lwa mayu?

<sup>126</sup> Yesu o livhuwa Khotsi uri O Li dzumbela vho funzeaho, na vho ḫalifhaho, na vhaçali, na vho thanyaho, huno u do Li dzumbulula kha vhusie vhu no do da Khalivari.

<sup>127</sup> Zwino sedzani. Yesu o amba. Sedzani uri O zwi amba hani. “Mishumo ine Nda ita,” U khou i ita zwa zwino. “Mishumo ine Nda khou i ita zwino, u fhodza vhalwadze, u vusa vhafu, u bonyolosa mađo a mabofu, heyi mishumo na inwi ni do ita-vho. Ni do ita hezwi arali ni tshi Ntenda. Ni ita heyi mishumo. Huno zwenezwo mihulwane u fhira heyi ni do ita, ngauri Ndi khou ya ha Khotsi Anga.”

<sup>128</sup> “Hu si kale, huno shango a li tsha do Mmbona, naho zwo ralo ni do Mmbona. Ndi do vha na inwi, na kha inwi, u swika vhufheloni ha shango. A thi nga ni sii ni si na khuthadzo. Ndi do rabela Khotsi; U do ni rumela muñwe Mukhuthadzi, ane a vha Muya Mukhethwa, ane shango la si kone u mu ḫanganedza; naho zwo ralo, inwi ni nga Mu ḫanganedza.”

<sup>129</sup> Zwino dzhielani nzhele. Mishumo “mihulwane,” yo vha i ya u vha na Maanda Tshivhidzoni, hu si u fhodza fhedzi vhalwadze nga thabelo, u pandela vhodiabolo nga thabelo, fhedzi u kovhela

vhatendi Vhutshilo Vhu Sa Pheli. Muya Mukhethwa wo vha u tshi khou da, nahone wa nekedzelwa zwandani zwa Tshivhidzo, u kovha Vhutshilo. Oo! Izwo ndi zwe Khaļivari ya amba zwone. Yo dzhia vhanna na vhasadzi vho kotamaho, vho nyadzwaho, huno ya vha takulela ngomu ha fhethu, u vha vharwa na vhananyana vha Mudzimu, u fhodza vhalwadze na u kovha Vhutshilo Vhu Sa Pheli; nga u nea Muya Mukhethwa vhatendi vha thetshelesaho, vhatu vhe vha vha vhe vha sa tendi, vha itwa vhatendi, huno vha kovha Vhutshilo Vhu Sa Pheli, ha mya. Naa ndi zwihiwlane zwingafhani, u ri . . .

<sup>130</sup> Uyu musadzi a lwalaho o edelaho hafha, ndi nga rabela thabelo ya lutendo huno u do fhola. Itsho ndi tshithu tshihulwane. Izwo ndi zwe A vha a tshi khou ita tshifhingani itsho.

<sup>131</sup> “Fhedzi,” ha pfi, “mihulwane u fhira heyi ni do ita. Ndi khou yo ni nea Maanda, hu si u mu vusa fhedzi lwa tshifhinganyana, fhedzi u mu nea Vhutshilo Vhu Sa Pheli, vhune ha do vha ha U Ya Nga Hu Sa Pheli, lini na lini.” Vhatu vha shayaho, vho porulaho, vha tungufhadzaho, naa izwo zwi ni pfuka hani? Naa a ni vhoni zwine tshithu “tshihulwane” tsha vha zwone? Itsho ndi tshithu tshihulwanesa tshe tsha vhuya tsha bvelela, u kovhela vhatu Vhutshilo Vhu Sa Pheli. Naa Vhutshilo Vhu Sa Pheli ndi mini? Vhutshilo he A vhu tshila, Vhutshilo he ha vha vhu Khae, Uvho vhu kovheleni vhanwe. Naa muthu a nga zwi ita izwo? Murwa wa Mudzimu a nga kona.

<sup>132</sup> Yesu o ri, “Vhane na hangwela zwivhi zwavho, khavho zwo hangwelwa; vhane na sa vha hangwele zwivhi zwavho, khavho a zwo ngo hangwelwa.”

<sup>133</sup> Zwino ngepha he tshivhidzo tsha Katolika na vhańwe vhanzhi vha ita khakho khulu yavho. Vha bvela nn̄da huno vha ri, “Ndi a ni hangwela zwivhi zwańu.” Izwo zwo vha zwi si zwone.

<sup>134</sup> Naa vho wana hani u hangwelwa ha zwivhi, Bivhilini? Petro o fhindula iyo mbudziso, nga Duvha la Pentekoste. Vho ri, “Naa ri nga itani uri ri tshidzwe? Naa ri nga wana hani Itshi tshine nothe na vha natsho?” A vhea phasi ndayamushonga. A vha vhudza zwine vha tea u ita.

<sup>135</sup> A ri, “Shandukani, muńwe na muńwe wańu, kha Mudzimu, huno ni lovhedzwe nga Dzina la Yesu Kristo.” U itelani? Khangwelo ya tshivhi tshańu. Ngeyo mishumo “mihulwane.”

<sup>136</sup> Naa ni vhangana, vhoiwi vhareri matsheloni ano, naa ni vhangana, vhoiwi vha no khou thetshelesa Ippi langa kha theiphi ya maginete, vha no funa u ya Khaļivari matsheloni ano? Huno sedzani zwe Mudzimu a ni itela zwone henengei. Huno furalelani ndaela dza dinomineisheni dzanu, huno ni rere Mafhungo-madifha. Haļeluya! Zwi kha shumbi lanu zwino. Naa ni khou yo itani Ngalō?

<sup>137</sup> “Ngauri tshanduko na khangwelo ya zwivhi zwi fanela u rerwa nga Dzina Lawe, kha shango lothe, u thoma Yerusalem.” Haleluya! Vhugala! Khezwo.

<sup>138</sup> Naa Khalivari i amban i kha inwi? Naa ilo duvha lo itani kha inwi? Naa lo ni dadza, nga thelodzhi? Naa lo ni ita muthu o huduluwaho? Kana lo ni ita Mukriste, o rengiswaho? Haleluya!

<sup>139</sup> Tshivhi, tsho hangwelwa! “Mishumo mihulwane u fhira heyi ni do ita.” Ni a vhona uri “vhoiñwi” ndi vhonnyi, a ni ralo? “Mishumo mihulwane u fhira heyi,” u hangwela zwivhi, nga Dzina la Yesu Kristo.

<sup>140</sup> Fhedzi nga dzindaela na dzidinomineisheni, na zwiñwe-vho, zwo ni hungelela fhasi kha fhethu, ni kha di shumela shango. Mmbudzeni nga ha muñwe munna-vho, mmbudzeni nga ha muñwe musadzi-vho, ane a nga da Khalivari huno a lingedza u vha muñwe muthu muhulwane ngauri muñwe muthu o amba tshiñwe tshithu. Mmbudzeni nga ha hune ni nga sedza tshifhatuwoni tsha Khalivari, i kha tshedza tshayo tsho fanelaho, ilo duvha Khalivarini. Naa ni nga vha hani na duvha lanu kha Khalivari, huno na bva ni muthu o huduluwaho? Naa ni nga bva hani ni muthu a langwaho nga muñwe wa linwe dzangano, huno na rera pfunzo dzo itwaho nga muthu? Ndi ngani zwi sa ni tukufhadzeli kha Ipfi la Mudzimu? Arali ni tshi nga vhuya na ya henengei, ni do bva ni a ditukufhadzaho. Naa ni nga toda hani u vha tshiñwe tshithu tshiñhulu kha dzangano lanu, ni na muthenga muñadzini wau, ngeno Yesu Kristo Murwa wa Mudzimu o Ditukufhadza kha muvhili wo tshetshekanywaho, u swika kha tshifhatuwo tsho pfelwaho mare, u swika kha thoni na u tsitswa? Huno vho bvula zwiambaro Zwawe, huno vha Mu vhamba, phanda ha shango. “A tshi nyadza thoni.” Naa ni nga ya hani Khalivari huno na bva ni tshiñwe tshithu tsho fhambanaho na zwe A vha e zwone, u tsitswa, thoni?

“Oo,” inwi ni ri, “vha do nthahela nn̄da.” I ri ni vha rahe.

<sup>141</sup> Ivhani na duvha lanu Khalivari, Mudzimu u do vha na ndila Yawe na inwi. Kha ndi redze izwo hafhu. Ivhani na duvha lanu Khalivari, Mudzimu u do vha na ndila Yawe na inwi.

Kha ri rabele.

<sup>142</sup> Murena, Oo Mudzimu, ri dzhie rothe u swika Khalivari zwenezwino. Kha ri tutshele kule ha vhurine, Murena, u ofha vhathu, u ofha zwine muñwe muthu-vho a khou yo amba. Mulandu, shango lothe lo Mu sea, la tamba Ngae. Fhedzi O vha a thetshelesaho, u swika lufuni. O vha a thetshelesaho, u swika kha u tsitswa. O vha a thetshelesaho, naho e fhasi ha muvhuso wa federala.

<sup>143</sup> Huno ri a limuha uri musi Satthane a tshi rwa ili lifhasi, o vha muvhusi na maandalanga lifhasini. O tanziela zwi fanaho

phanda ha Murena washu, huno a ri, "Heyi mivhuso ndi yanga. Ndi do i ita zwine nda funa." Huno ri a zwi limuha hezwo, u bva lenelelo duvha u swika kha lino, lino shango, fhasi ha samba, lo vhuswa nga uyo o li semaho.

Fhedzi, Mudzimu, Oo Mudzimu, ri shumela Muvhuso u songo señwaho.

<sup>144</sup> Khotsi, Mudzimu, zwi mangadza hani, zwauri Wo ita zwithu zwihiwlane kha-kha shango la zwifanyiso ñamusi. U tshi tendela izwi zwifanyiso zwihiwlane, vhunga *Milayo Ya Fumi*, na zwiñwe-vho, u bva, u tendela vhanna na vhasadzi u vhona, vhe vha sa vhuye vha swifhadza vothi la kereke, fhedzi wa vha tendela u vhona uri ndi mini. Ndila ya Mudzimu ndi ndila yo landulwaho, nga shango. Ngauri ri tou nga... Ri ya Russia fhasi ha vhukomunisi.

<sup>145</sup> Ri kha lino shango, fhedzi a ri vha lino shango. Ro ya Khalivari. Ro divhamba, u itela Muvhuso wa Mudzimu, u vha muñwe Wawe. A hu londwi zwine shango la amba, ri dzhia ndila na vho nyadziwaho vha si gathi vha Murena. Ri bvela phanda ra ya kha mvuwo, huno ri a tenda uri hezwo zwi do swika hu si kale, Murena, u swika musi ri tshi do vuselwa ngomu Muvhusoni une wa do langa ili shango. Vhunga Daniele o u vhona phanda, huno wa kwashékanya shango lothe, la vha mungu muñuku, huno muya wa li vhudzulela kule la bva luvhatani lwa tshilimo. Fhedzi, thavha, Tombo la aluwa la vha thavha khulwane ye ya tibedza liphasi. Illo Tombo li do da. Oo Mudzimu, ri todou vha tshipida tshalo. Kha ri dihangwe, ri hwale zwifhambano zwashu duvha na duvha, ra tshirela Kristo, ra tshirela vhañwe. Zwi tendele, Murena.

<sup>146</sup> Hu na vhañwe matsheloni ano, nahone vha sa Mu dihvi sa Mutshidzi, huno vha todou humbulwa kha thabelo ya u vala, huno na do takalela ili u vha duvha lanu ngei Khalivari, ni do imisa zwanda zwanu, huno na ri, "Nthabeñeleni, Mukomana Branham. Ndi todou Mu dihvi sa Mutshidzi wanga." Mudzimu a ni fhañtshedze, muthu muswa. Muñwe muthu-vho? Mudzimu a ni fhañtshedze, mukomana wanga henefho murahu.

<sup>147</sup> Naa hu do vha na muñwe-vho? I ri ni, "Ndi todou Mu dihvi. Ndi toda ili li tshi vha duvha ngei Khalivari, langa. Ndo neta nahone ndo dinalea. Naa zwi mpfarisani u tamba u mona hafha nga tshenetsho tshithu tshe nda bebelwa u tshi ita? Ndo bebwah, bebwah u vha murwa wa Mudzimu, huno ndi fhano ndo farelela kha zwithu zwa shango. Mudzimu, i ri ndi vhambiwe ñamusi. I ri ndi vhambe, ñamusi, nñe muñe na mihumbulo yanga, uri ndi kone u tshila na Kristo, huno nda tshirela vhañwe. A hu londwi zwine vha nnyita,

uri vha tambe nga nne, huno vha ntovhola, nahone vha nnyamba vhuvhi hothe, na zwithu, i ri ndi tou tshimbila nga u dijukufhadza, ndi na vhulenda, vhunga ngwana, vhunga O ita. Huno linwe duvha, O fulufhedzisa u mvusa hafhu, nga Duvha la u fhedzisela. Ndi toda ilo Duvha." Naa hu do vha na zwiwe zwanda two engedzeaho zwi no do ya nthia? Mudzimu a ni fhatutshedze henefho murahu, na inwi. Zwo luga. Vhanwe vho engedzeaho fhedzi... Mudzimu a ni fhatutshedze. Mudzimu a ni fhatutshedze. Vhanwe vho engedzeaho, vhenevho ri sa athu rabela.

<sup>148</sup> Khotsi ashu wa Tadulu, ho ambiwa, musi Petro o rera nga Duvha la Pentekoste, "Vhanzhi vhe vha tenda vha engedzwa kha Tshivhidzo." Vho tenda ngangoho nga mbilu dzavho dzothe. Avha vhathu vhane vha kha di bva u imisa tshanda tshawho, ndi a tenda zwaauri vho tenda nga mbilu dzavho dzothe. Huno arali vho ralo, hu na tivha la madi lo lindelaho fhano. Vha toda izwo zwivhi zwi tshi hangwelwa. Hu na muwe muthu fhano ane a nga vha lovhedza nga ilo Dzina, nahone Dzina li lothe li re hone fhasi ha Tadulu lo newaho vhathu, la uri ri fanela u tshidzwa.

<sup>149</sup> Ngauri, vhunga ndo redza Luñwalo zwifhinganyana two fhiraho, uri, "Tshanduko na khangwelo ya tshivhi zwi fanela u rerwa nga Dzina Lawe, kha shango lothe, u thoma ngei Yerusalem." Huno ngei Yerusalem, musi tshanduko na khangwelo ya tshivhi two no rerwa, muapostola o vha vhudza zwa Mañwalo, huno a ri, "Vha fanela u shanduka, tsha u thoma, huno zwenezwo vha lovhedzwe nga Dzina la Yesu Kristo." Uyo wo vha u mushumo wa mureri une a tea u u ita. Uri vhone vha shanduke, huno ene a vha lovhedze u itela khangwelo ya tshivhi tshawho. "Vhane na vha hangwela zwivhi, khavho two hangwelwa; vhane na sa vha hangwele, khavho a two ngo hangwelwa."

<sup>150</sup> Khotsi, naa shango lo da la thoma hani u vha kha mbiti vhunga vha nadzo? Ndi ngani vha sa tendi Mafhungo-madifha a sa kondiho? Huno nahone vha dzenisa ngomu, zwa hayo, sa tshiimela: madzina a khole-khole, ndovhedzo ya khole-khole, ndovhedzo dza Muya Mukhethwa dza khole-khole, u khađana na vhashumeli, hu tshi shumiswa maimo a Khotsi, Murwa, Muya Mukhethwa, zwine na kathihi zwa sa vhe Mañwaloni; linwalo lo itwaho nga vhanna vha Roma, hu si pfunzo ya Tshikriste i siho fhethu Bivhilini. Khangwelo ya zwivhi i nga si wanale nga vhuimo, fhedzi nga Dzina la Yesu Kristo.

<sup>151</sup> Zwino, Khotsi, ri a divha zwauri a zwi takalelwii nga maanda. Tshifhinga tshothe ndila Dzau dzo vha nga heyo ndila. Fhedzi i ri vhanna na vhasadzi, matsheloni ano, vha de kha ilo duvha, ilo duvha ngei Khalivari. He, Yesu, a tshi nyadza ilo

duvha, idzo ḫoni, dza u bvulwa, dza u tshetshekanywa a bva zwipiḍa, dza u pfelwa mare, nahone ha tambiwa ngae; nga shango lothe, nga tshivhidzo, nga vhatu vhe vha vha vho tea vho Mu funa. Huno, naho zwo ralo, kha hezwo zwoṭhe, Ho ngo vula mulomo Wawe, huno a ya nahone a fela avho vhatu vhe vha vha vha tshi khou tamba Ngae.

<sup>152</sup> Mudzimu, ri dzhie u ri ise Khalivari matsheloni ano. Huno arali vha tshi ri ri a penga, vha tshi ri ri pfectesa Mañwalo nga ndila yo khakheaho, tshiñwe na tshiñwe tshine vha ḥodou amba, Mudzimu, vha nga si ime Vhuhoneni ha Mudzimu huno vha ri Lo khakhea.

Vha nga si kone u tibedza zwivhi zwavho nga Bivhili. Bivhili i tibulula zwivhi zwavho: u sa tenda havho; u ḥodou takalelwā; u ita vhunga gogo lothe. I ri vha de Khalivari matsheloni ano.

<sup>153</sup> “Huno thomani ngei Yerusalem; uri tshanduko na khangwelo ya zwivhi zwi rerwe nga Dzina Lawe kha tshakha dzoṭhe, u thoma ngei Yerusalem.”

I ri vha dzhie ilo ligi li fanaho lo vhambiwaho la u tshetshekanywa; huno vha pfelwa mare; huno ha tambiwa ngavho; nahone vha vhidzwa tshiñwe na tshiñwe tshine vha naga vhidzwa tsha lushaka lwa vhagunei vha vhurerelini; mukherukanyi wa zwivhidzo; zwoṭhe zwine vha ḥoda u vhidza.

Ngavhe riñe, Murena, matsheloni ano, ri tshi fara ndila yashu na vha nyadziwaho vha si gathi vha Murena. Ngavhe ri tshi tshimbila sa zwe vhaapostola vha ita, ri sa rembulutsheli kha tshaūla kana tshamonde, nahone u bva kha vhudi ha mbilu dzashu ra shumela Mudzimu. Zwi tendele, Khotsi.

<sup>154</sup> Zwino, fhodza vhalwadze na vha thupheaho vha no khou dzhena mudubani wa thabelo. Ngavhe avha vha no imisa zwanda zwavho, mbiluni dzavho, vha tshi shanduka, zwa zwino. Ngavhe avha vho imelaho murahu lwa tshifhinga tshilapfu nga maanda, vha tshi tavhanya vha ya madini huno vha ita uri zwivhi zwavho zwi hangwelwe nga Dzina la Tshiṭhavhelo, Yesu Kristo, Murwa wa Mudzimu. Amene.

Ngei tshifhambanoni he Mutshidzi wanga a fa,

Henengei ndo lilela u ḫanzwiwa tshivhini;

Henengei Malofha o shumiswa kha mbilu yanga;

Vhugala kha Lawe...

Vhugala kha Dzina Lawe!

Oo, vhugala kha Dzina Lawe!

Oo, henengei Malofha o shumiswa kha mbilu yanga;

Vhugala kha Dzina Lawe!

Ndo tshidzwa tshivhini lu mangadzaho nga  
maanda, (Hani?)  
Yesu u dzula ngomu lu difhesaho,  
Henengei tshifhambanoni he A... (Ivhani  
muñwe wa Vhawe.) ngomu;  
Oo, vhugala kha Dzina Ławę!  
Vhugala kha Dzina Ławę!  
Vhugala kha Dzina Ławę! (Dzina Łavhuđi.)  
Oo, henengei... Malofha o shumiswa kha  
mbilu;  
Vhugala kha Ławę...  
Vhugala kha Ławę...

<sup>155</sup> Naa ulwo a lu tou ita tshiňwe tshithu kha inwi? Lu tou ni huća. Lu dzenisa fulufhelo kha inwi: Vhutshilo, Vhutshilo Vhu Sa Fheli.

<sup>156</sup> Ndi mini “u vhambiwa na Kristo”? Ndi u tshilela vhańwe. Vhańwe vha lushaka-de? Avho vha no ni vhenga, avho vhane vha sa do ni takalela, avho vha no do tamba nga inwi: vha tshileleni; ivhani navho; vha funeni; “rabelelani avho vha ni semaho, vha no ni pomoka vhuvhı hothe hu u zwifha, vha tshi itela Dzina Łanga. Vho tovhola vhaporofita vho ni rangaho phanda.”

<sup>157</sup> Ndo elekanya uri thańwe mulaedza u do thusa tshivhidzo matsheloni ano, uri ni do vhon auri ri Łoda Khalivari, ri Łoda u vhambiwa.

<sup>158</sup> Zwino yo itwani tshothe? Yo badelelwa tshothe. Khaladzi a re kha tshidulomilinga, kha vhathe fhano vha no khou lwala na u thuphea: Yo badelelwa tshothe; tshithu fhedzi tshire na tea u ita ndi u tenda zwauri ndi yańu; i Łanganedzeni nga ndila i fanaho, huno ni do fhola.

<sup>159</sup> Elelwani: Zwino ndi mini? Ni nga ya kha shango, na rera Mafhungo-mađifha, na fhodza vhalwadze; huno na kovha Vhutshilo Vhu Sa Fheli.

Zwi do vha zwihiulwanesa hani: zwa, munna ngoyu o edela hafha e na-e na tshizwimbo, pfuko, tshiňwe na tshiňwe tshire tsha vha tshore. (Ro no Mu vhon a zwifhinga zwinzhi nga maanda a tshi kovha phađutshedzo Dzawe huno a fhodza munna, a fhodza musadzi; tsumbo dzi sa kundelwi dza mahumi a zwigidi a tshi andiswa nga zwigidi a tsumbo dzi sa kundelwi u mona na lifhasi, ni a vhon a tshi vha bvisa kha dzikhotho, zwiđiretsha; murunzi fhedzi wa vhathe vha liwaho nga pfuko; namusi, vhathe vhavhuđi, vho takalah.) Iyi mishumo ine Nda ita na inwi ni do ita-vho; fhedzi mihulwane kha iyi ni do ita; “yo engedzeaho u fhira iyi,” ndi zwone.

Mini? Ndo vha nea nyengedzedzo ya vhatshilo, nga Dzina Ła Yesu, u lapfisa vhatshilo havho lwa mađuvha a si gathi.

Fhedzi, “Yo engedzeaho u fhira iyi ni do ita: ni do vha nea Vhutshilo Vhu Sa Fheli nga Dzina Łanga.” Whew!

<sup>160</sup> Ndi ngani inwi no vha ni tshi ḋo vha na thoni nga iļo Dzina ḥavhudī? Ndi ngani vhathu vho vha vha tshi ḋo ṭutshela kule haļo nahone vha li furalela? Ndi diabolo. Zwa vhukuma.

<sup>161</sup> “Tshanduko na khangwelo ya tshivhi zwi fanela u rerwa nga Dzina Lawe kha shango lothe, u thoma Yerusalem.” Afho ndi hone he Mulaedza wa thoma u bva. Naa izwo ndi zwone? “Tshanduko na khangwelo ya tshivhi zwi ḋo rerwa nga Dzina Lawe, u thoma Yerusalem.”

<sup>162</sup> Zwino, tsha u thoma, ri ḋo ita sa Ene o ita: ra vha na thabelo ya u fhodza vhalwadze.

<sup>163</sup> Tshi tevhelaho, ri ḋo vha na tshifhiwa tshihulwane: Madi o luga, hafha murahu, u itela muňwe a no ḥoda u lovhedzwa (hu na zwiambaro ngomu hafha zwa vhasadži, zwiambaro ngomu hafha zwa vhanna), zwo ni lindelaho uri ni ite uri zwivhi zwańu zwi hangwelwe; ngauri elelwani, uri ni nga ita uri zwivhi zwańu zwi hangwelwe fhedzi u ya nga pfunzo ya Bivhili. “Ngauri a hu na lińwe Dzina fhasi ha Ṭadžulu ḥo ḥewaho vhathu, line na fanela u tshidzwa ngalo.”

<sup>164</sup> Paulo o ḥangana na vhańwe vhe vha vha vho no di lovhedzwa. Huno vho vha vha tshi khou ḥavha mukosi, vhe na gundo. A ri, “No lovhedzelwa khani?”

Vha ri, “Kha Yohane.”

A ri, “Yohane o lovhedzela kha tshanduko.” Zwino, pfesesani hezwi: kha tshanduko, hu si u itela khangwelo ya tshivhi. Ndi vhangana vha no pfesesa izwo? Hu si u itela khangwelo ya tshivhi. Vho vha vho lovhedzwa nga ndila yone, kha tshanduko. Vho vha vho no shanduka: “Ee, muňe wanga, ndo shanduka. Ndi, a tenda uri U khou da.” Vho vha vho lovhedzelwa *kha tshanduko*; ndi u ri, “vha tshi khou tenda kha Murena Yesu Kristo.”

<sup>165</sup> Zwenezwo musi vha tshi pfa *izwi* (zwauri Tshihlavhelo tsho no di da), vha dovha vha lovhedzwa, nga Dzina la Yesu Kristo. Huno zwenezwo, vha kovhelwa, musi a tshi vhea zwanda zwawe khavho, Muya Mukhethwa; huno vha amba nga dzindimi nahone vha porofita.

<sup>166</sup> Zwino, ni khou yo shandukisa hani Luńwalo? Inwi vheani munwe wańu fhethu huthihi Bivhilini he muńwe muthu a vhuya a hangwelwa zwivhi zwawe, kha Testamente Ntswa, na we a vhuya a lovhedzwa nga ińwe ndila-vho nga nn̄da ha Dzina la Yesu Kristo.

<sup>167</sup> Ntsumbedzeni fhethu huthihi Bivhilini he muńwe muthu-vho a vhuya a lovhedzwa nga Dzina la Khotsi, Murwa, Muya Mukhethwa. Kana disani desikini yanga ḫivhazwakale, ḫivhazwakale ya tshivhidzo i no sumbedza he muńwe muthu a vhuya a lovhedzwa nga Dzina la Khotsi, Murwa, na Muya

Mukhethwa, u swika miñwaha ya dararu na zwithu nga murahu ha lufu lwa muapostola wa u fhedza, musi tshivhidzo tsha Katolika tshi tshi dzudzanywa.

<sup>168</sup> Zwino, ndi na Pre-Nicene Fathers, na...vhadihvazwakale vhothe, na tshiñwe na tshiñwe, henehfo vhuguñeloni hanga: divhazwakale ndala nga maandesa, yo khetheaho shangoni; vhuñanzi vhu sa kundelwi vhu hothe vhune ra vha naho.

<sup>169</sup> Vhalani *Our Sunday Visitor*, kana katekisima ya tshivhidzo tsha Katolika, huno ni vha sedzese, zwine vha amba zwone: "Vhañwe vha Vhaporotestanti khañwe vha do tshidzwa, ngauri vha gwadamela pfunzo ya Katolika: Ngauri Bivhili yavho i ri, 'lovhedzani nga Dzina la Yesu Kristo,' fhedzi ro dzhia u khethea ha 'Dzina la Yesu,' huno ra hu vhea kha 'Khotsi, Murwa, Muya Mukhethwa,' huno vha a zwi tenda."

Zwino, ntsumbedzeni Luñwalo lwo fhambanaho na izwo.

<sup>170</sup> Huno khezwo. Huno naho zwo ralo, shango li a i gwadamela. Mulandu? Na kathihi a vha athu ya Khalivari. Izwo ndi zwone. Na kathihi a vha athu vhona.

<sup>171</sup> Vha do tamba nga inwi nahone vha ni vhidza...vha do vhuya vha ni vhidza, "Muvhumbuluwi-mukhethwa," "Yesu fhedzi," na ayo madzina othe a vhusweleli ho kalulaho ane vha kona. Naa zwine vha ni vhidza zwone zwi ita phambano-de? Naa vho ita...O londa zwe vha Mu vhidza zwone? O vhambiwa. O tshirela Mudzimu, nahone Mudzimu e ethe. Huno arali wonoyo Muya muthihi, we wa vha u Khae, u kha inwi, u do ni ita uri ni ite zwenezwo zwithihi: no hwala Dzina Lawe. "Tshiñwe na tshiñwe tshine na ita" (i ralo Bivhili) "nga ipfi kana nga nyito, ni tshi ite tshothe nga Dzina la Yesu, ni tshi nea Mudzimu thendo."

<sup>172</sup> Naa ni i wanafhi iyo pfunzo ya vhuraru vhuthihi, ya tshihedeni? Kha katekisima, hu si kha Bivhili. Ipf "vhuraruthihi" a lo ngo vhuya la bulwa Mañwaloni othe u bva kha Genesi u swika kha Nzumbululo. A hu na tshithu tsho raloho. A hu na tshithu tsho raloho tshi no nga mudzimu wa vhuraruthihi. Ndi Ene Mudzimu, Mudzimu e ethe, Mudzimu muthihi. Tshifhinga tshothe o vha Mudzimu muthihi. O shuma kha ofisi tharu: O shuma sa Khotsi nga tshiñwe tshifhinga, fhasi ha Mushe. O shuma ñamani nga tshiñwe tshifhinga, sa Murwa, Yesu. Zwino U shuma sa Muya Mukhethwa. Fhedzi ndi Mudzimu muthihi. Mudzimu muthihi, hu si a re na madzina mararu. Ofisi tharu, maimo mararu nga Dzina lithihi: Yesu Kristo.

<sup>173</sup> Tshiñwe tshithu tsho fhambanaho ndi tsha tshihedeni; huno ndi humbela muñwe muthu u sumbedza izwo, arali zwi si zwone. Izwo ndi zwone. Ndo amba izwo miñwaha na miñwaha na miñwaha, huno a hu na muthu we a zwi dzhia, naho zwo ralo (Ni a vhona?), ngauri zwi nga si vhe nga u ralo. Ndi na... ngeyi Bivhili, tsha u thoma; huno ngedzo divhazwakale ndala

u sumbedza uri ndi zwone kokotolo. Huno ndi ngani diabolo a tshi tou...? Ndi...Ndi zwone, Bivhili yo ri vha do vha nga iyo ndila: "Vha nga da hani, nnđani ha musi Ndi tshi vha kokodza?" Izwo ndi zwone fhedzi zwine nda divha nga hazwo. Izwo ndi zwe Yesu a amba, ngauralo...

<sup>174</sup> A thi khou amba izwo uri ndi vhe...Arali izwo ndo zwi amba, huno ndi tshi khou rera theri i no nga iyí, ndo vha ndi tshi do vha muhoi wa phasisa vhukati hanu. Izwo ndi zwone. Ndi amba izwo ngauri Ndi Ngoho nahone Ndi Vhutshilo. Vhanzhi vho lovchedzelwaho kha Kristo, vha ambara Kristo. Vha na Vhutshilo, nga Dzina Lawe.

<sup>175</sup> Ri rabela nga Dzina Lawe, ri ṭoda nga Dzina Lawe, ri rera nga Dzina Lawe, ri lovchedza nga Dzina Lawe, ri tshila nga Dzina Lawe, ri fa nga Dzina Lawe, ri ya Tađulu nga Dzina Lawe, ri vuwa nga Dzina Lawe. "Muṭa woṭhe Tađulu wo rinwa Yesu." Bivhili yo ralo: "Muṭa woṭhe kha liphasi wo rinwa Yesu." O ri, "Ndo da nga Langa..."

Inwi ni ri, "Zwo ralo, ndi Dzina la Khotsi."

*Khotsi* a si dzina, ndi vhuimo. O ri, "Ndo da Dzinani la Khotsi Anga, huno a no ngo Ntanganedza." Zwino, O da nga Dzina liphio? Uh-huh. Zwa vhukuma, "...huno a no ngo Ntanganedza."

<sup>176</sup> Ngauralo khezwo; zwo tou, iina, zwo dzumbiwa maṭoni a vhaṭali na vho thanyaho. Nga ngoho, ndi ngoho, uh-huh.

<sup>177</sup> Huno nga hangei kha Nzumbululo, sa zwe ra funza liñwe ḫuvha: ngetsho tshivhidzo tsha kale tshi re phombwe, tshire tsha vha dzangano la u thoma; huno zwenezwo tsho vha na tshivhalonyana tsha vhananyana vhe vha bebiwa ngatsho. Vha ita zwenezwo zwithihi, ndowelo yeneyo nthihi. Tshi khunyelela tshoṭhe Babele, nga ndiña yeneyo nthihi, na...na tshivhidzo tsha Roma na mbumbano ya zwivhidzo zwa—zwa dzitshakha; huno asiyo, zwoṭhe zwi khou khunyelela, zwoṭhe kha tshithu tshenetsho tshithihi, gungwa ḥeneļo lithihi.

<sup>178</sup> Fhedzi Tshivhidzo tsha Mudzimu (Haļeluya!), ndi Tshivhidzo tsho vhidzelwaho nnda, tsho khaukanaho. Tshivhidzo tsho fhaṭwa hani? Ni do zwi divha hani izwi? Ni nga kona u vhuja na divha hani uri izwi ndi Ngoho? Musi Mudzimu a tshi ni dzumbululela zwone. Abele o divha hani—hani uri ho vha hu ngwana vhudzuloni ha maapula? O dzumbululewa zwone: "Nga lutendo Abele o nekedza Mudzimu tshiṭhavhelo tshavhuđivhuđi lwo engedzeaho."

<sup>179</sup> A tshi tsa Thavhani ya Phenyiso, Yesu u ri, "Naa vhatu vha tshi nnyamba vha ri ndi Nne nnyi?"

Vhanwe vha ri, "Eliasi," "Mushe," na zwiñwe-vho.

A ri, "Fhedzi Ndi khou vhudzisa vhoinwi, 'Naa ni ri ndi Nne nnyi?'"

Petro a ri, "Iwe u Kristo, Murwa wa Mudzimu a tshilaho."

<sup>180</sup> A ri, "Inwi izwi a no ngo zwi guda na kathihi..." Nga iñwe ndila (Ndi amba izwi, hu si u ḥoda u vha muhulu, fhedzi u ombedzela kuvhonele): "Inwi izwi a no ngo zwi guda kha iñwe seminari na kathihi; muñwe munna ho ngo ni funza izwi na kathihi; fhedzi Khotsi Anga, a re ngei Tadulu, o u dzumbululela izwi: zwauri NDI NNE (hu si Khotsi, Murwa, na Muya Mukhethwa, fhedzi, ndi Nne Yesu Kristo). Huno kha ili tombo (Naa tombo lifhio? Lenelo lithihi le Abele a ya; kha iñ tombo lithihi.), kha ili tombo, Ngoho ya Mudzimu ya maya yo dzumbululaho, Ndi do fhata Tshivhidzo Tshanga, huno khoro dza vhudzulavhafu dzi nga si tshi kunde na kathihi." Izwo ndi zwone. Vha a zwi lingedza, fhedzi a vha nga kundi na kathihi. Ni a vhona?

<sup>181</sup> Ngauralo itonu ya Khalivari, ni vhambiwe, ni vhuye, huno ni fare ndila yañu na vho nyadziwaho vha Murena vha si gathi, ni bvele phanđa.

<sup>182</sup> Zwino, Murena, ri khou kumedzela zwithu zweithe kha Iwe. A thi divhi, kha itsi tshigwada, tshire tsha vha ngomu hafha. A thi na muhumbulo wa u divha, Murena, nndani ha musi U tshi do zwi dzumbulula. Huno zwino, Khotsi Mudzimu, a thi khou U humbelu uri izwo u zwi ite. Ndo tou zwi vhea zwirumbini zwa vhathe. Khevho. Ngavhe uyu u tshi vha Khalivari ya vhukuma matsheloni ano; ngavhe u tshi vha u vhambiwa ha vhukuma kha lufuno lwa vhunqé, na kha lutamo lwa vhunqé, na kha zwithu zwihiulu zwa vhutshilo.

<sup>183</sup> Ngavhe vhanna vha tshi vha vha dítukufhadzaho, nahone vha funaho u fara ndila na vho nyadziwaho vha Murena. Ngavhe vha tshi tshimbila nga u dítukufhadza. Ngavhe vha tshi bebelwa ngomu ha uyu Muvhuso, uyu Muvhuso wa Mudzimu muhulwane, une wa vha muvhili wa maya, muvhili wa makoleni wa Kristo kha lifhasi: "Nga Muya muthihi rothe ri lovhedzelwa ngomu muvhilini muthihi."

<sup>184</sup> Zwi tendele, Murena. Kana ndi vhatswu, vhatshena, vhatshirulwane, vhamuronzhe, tshiñwe na tshiñwe tshire vha vha tshone, wa tshinnani kana wa tthisadzini, o vhoxwaho kana o vhofholowaho: rothe ro itwa uri ri nwe kha wonoyo Muya muthihi.

<sup>185</sup> Zwi tendele, Khotsi, huno ngavhe zwi tshi vha na... kha vhanzhi, matsheloni ano, uri vha do pfesesa; ngavhe U tshi vula thalukanyo yavho. Zwenezwo, li do nga ḫuvha liswa khavho: ḫuvha li do penya, huno tshedza tsho nzwinzwimalaho tsha theolodzhi dzo itwaho nga muthu dzi do tengamela kule, huno Tshedza tsha Mudzimu tshi do penya ndilani yavho, huno tsha phuletshedza kha lupila lu no ambadza lupila kha

itshi Tshedza tsho nakaho. Huno vha nga kona u tshimbila kha gondo la vhukhethwa, zwenezwo, vha tshi khou tshilela vhañwe, sa Kristo o ita.

<sup>186</sup> Zwino musi ri tshi dzhenisa muduba, ndi rabela uri U do dolisa vhalanda Vhau matsheloni ano, riñe roþe, ri tshi rabela, muñwe a tshi itela muñwe. Huno tendela, ñamusi, zwauri muthu muñwe na muñwe a lwalaho a daho nga uyu muduba a fhole. Ngavhe vha tshi vhuya, sa musidzanyana wa mangai, na mutukanyana, na ene...na uyo mufumakadzi wa mualuwa, na—na Mukomana Wright, na vhunzhi ha avho vho fhiraho, Murena, vhe na mathupho na malwadze na tshiñwe tshithu tshe madokotela a kundelwa u tshi fhodza; huno ngevha ñamusi (zwenezwino vhege yo fhiraho), huno ngevha, vho takala, ñamusi.

<sup>187</sup> Mudzimu, ngavhe vhanna na vhasadzi vha tshi fhira vha na ulwo lutendo luthihi, vha tshi ðivha uri vha khou ya Khalivari u vhambiwa kha ngelekanyo dzavho na mihumbulu yavho ya uri vho “fhira phodzo.” Ngavhe maanda e a vusa Yesu tshaloni a tshi vha ñea vhutshilo, vhutshilo vhuhulwane ha lutendo.

<sup>188</sup> Huno zwenezwo, nga u ñavhanya nga murahu ha hezwi, ngavhe vhanzhi vha tshi da tivhani u itela ndovhedzo. Ri a humbelia, Dzinani la Yesu. Amene.

<sup>189</sup> Zwino, ri tou vha na miniti ya fumbili ya u ita muduba na tshumelo ya ndovhedzo. Zwino a ri na garaña dza thabelo. Ro bva kha izwo, huno ri do lingedza u zwi shuma miñanganoni yanga mihilwane musi ri tshi thoma. Ndo ni vhudza noþe, ro zwi vhekanya, ri nazwo kha theiphi, na hñwe na huñwe hune nda ya, idzo theiphi dzi do rumelwa phanda.

<sup>190</sup> Tshiga tshi tou sumba fhedzi kha phathutshedzo. Muhumbulo wo vha u, “Arali iwe u tshi do rabelela vhalwadze, ita uri vhathu vha u tende.”

Nda ri, “A vha nga ntendi.”

A ri, “U do ñewa izwi zwiga, huno nga izwi vha do tenda.” Zwiga zwo no tshimbila na u tshimbila, lwa miñwaha ya fumi u mona na shango, zwi sa kundelwi kha tshifhinga na tshithihi. A hu na u kundelwa, na luthihi, khazwo. Ndi vhangana vha no ðivha uri izwo ndi ngoho?

<sup>191</sup> Zwo luga, arali ni tshi nga tenda tshiga, zwenezwo tendani Mulaedza. Izwo ndi zwone. U a zwi sumbedza. Huno Mudzimu a nga dzhenisa Mulaedza kha nne (Huno a ita uri u vhe wo fhelelaho nga iyo ndila, nga nnđa ha zwine...) huno nda ni vhudza tshiñwe tshithu tshi no do vha tshi si tsha ngoho? Mudzimu a nga si ntendele u ita izwo. Hai, hai. Hai, muñe wanga. Nne ndi khou ni vhudza Ngoho.

<sup>192</sup> Zwino, vhoiñwi noþe vhane na ñoda u rabelelwa, u tou nga, kha uyu muduba hafha, iqani nga hangeno thungo heino, arali ni tshi funa, nga hangei, itani muduba u yela

kha tshauļa. Huno zwenezwo uyo u do tendela vhathe u fhira ri tshi rabela. Zwenezwo ri do wana vha—vhatukana, vhañei-vha-madzulo na avho vha do sedzes; huno musi vha tshi fhira nga hafha, zwenezwo nga hangeno thungo heino, ri do vha disa nga murahu, huno ra vha disa ngawo. Muñwe na muñwe a rabelelwa.

<sup>193</sup> [Muñwe u amba na Mukomana Branham—Mudz.] Oo, hai, aiwa, a tho ngo ita. Zwo luga, tshifhinga tshiñwe na tshiñwe tshine na funa. A zwi na thaidzo. Ni nga mu bvisela nnđa, kana ni...ndi nga...mu bvisela heneffho nnđa zwino, kana nga murahu zwituku, tshifhinga tshiñwe na tshiñwe a tshi ḥoda, a zwi na thaidzo.

<sup>194</sup> Zwino, kha ri fhumule u ya nga hune ra kona, kha iyi miniti i si gathi i tevhelaho. Ndi ḥoda nothe ni tshi elekanya zwino: Zwino, naa ndi mini—ndi mini tshe Bivhili ya amba? “Thabelo ya lutendo i do tshidza mulwadze.” Ndi vhangana vha no ñivha uri izwo ndi zwone? Ndi vhangana vha no ñivha uri Bivhili yo ri, “Izwi zwiga zwi do tevhela avho vhanne vha tenda. Mishumo ine Nda ita na inwi ni do ita-vho?” Huno mishumo yo vha i ifhio? O ri, “Ndi nga kona arali ni tshi tenda uri Ndi a kona u ita hezwi.” Naa izwo ndi zwone?

Naa mbudziso yanga yo vha i ifhio? “A vha nga ntendi.”

A ri, “Izwi zwiga zwi do vha itisa uri vha tende.”

<sup>195</sup> Zwino, arali ni tshi tenda, dilugiseni: Iyi ndi awara yañu ya phuluso. I tou fana na musi i tshi do vha yone kha tshivhi, ndi pfulufhedziso yeneyo nthihi ya Mudzimu onoyo muthihi.

<sup>196</sup> Zwino, ri na musadzi muñuku, a lwalaho fhano, a re na vhuleme ha thumbuni, a bvahō ngei New Albany. Ri khou yo mu rabelela, u thoma, uri a kone u wana—u wana tshidzulo tshawe. Zwino, ro fhumula, nahone muñwe na muñwe, zwino. Ndi ḥoda vharathu vha tshi nthusa, hafha. Huno kha ri kotamise zwifhañu zwashu lwa tshifhinganyana, zwino, u itela thabelo.

<sup>197</sup> Zwino, Khotsi wa Tađulu, ili lo vha Ipfi Lau. A thi na vhudifhinduleli ha muito une wa do dzhiwa khalo, fhedzi ndi na vhudifhinduleli ha u li rera. Huno ndi tshi ñivha izwi (nahone ndi tshi ñivha uri ndi munna wa murole wa vhukati zwino, huno nga línwe ñivha ndi fanela u livhana na Iwe): Ndo rera Ngoho i tshi bva mbiluni yanga. U a zwi ñivha. Hu si u vha na luvhengelambiluni, arali izwo zwe vha zwe ralo, Murena, zwenezwo ndi ḥoda tshanduko.

<sup>198</sup> Huno Khotsi, ndi rabela uri Iwe u do thusa, zwino, ri tshi ya u rabelela vhalwadze, ngavhe thabelo dzanga dzi tshi fhindulwa, hu si thabelo dzanga fhedzi, Murena, fhedzi thabelo ya itsi tshivhidzo, avha vhathe vha ḫungufhadzaho.... Mini-ha arali uyu o vha e mufumakadzi wanga o imaho hafha?

Mini-ha arali uyu o vha e ene, o dzulaho kha tshidulomilinga? Kana khaladzi anga? Mme anga? Oo, Mudzimu, fhodza avha vhathu. Naa U do ralo, Murena?

<sup>199</sup> Sedza, vho imaho mudubani wa thabelo: vhuleme ha mbilu, pfuko, tshizwimbo, tshakha dzothe dza malwadze na mathupho. Vhunzhi havho vha khou da (vha mađana vha khou phuluswa, u bva henehafha, Murena), huno vha a i vhone, huno vha a i tenda, huno vha khou da mudubani wa thabelo u ḥanganedza yavho. Vha khou da kha Tombo lo ḫalaho vhutshilo zwino, hu si mulanda Wau, fhedzi kha Murwa Wau, Yesu, Ane a vha Murangaphanda wa Tshivhidzo, Muthu wa myua, o dzumbamaho vhukati hashu. Huno ri tshi ṭuwa, ri tshi khou nekedza Dzina Lawe (Wo ri, “Nga Dzina ḥanga vha do pandela vhodiabolo.”), ndi rabela uri U do fhindula thabelo dzashu, Dzinani la Yesu. Amene.

<sup>200</sup> Zwino, muiwe na muiwe nga a vhe thabeloni. Zwino, itshi ndi tshipida tshanu, na inwi-vho. Iyi ndi thabelo yañu.

Zwino uyu musadzi muñku u fanela u fa, arali Tshiñwe tshitihu tshi sa mu thusi.

<sup>201</sup> Ndi vhangana vha no ḫivha Mukomana Stadsklev? Mukomana na Khaladzi Stadsklev? Ndo vhidzwa ndi Dzheremane kararu vhunwe vhusiku; lushie lwavho lwo fa. Vha humbelu, “Mukomana Branham, ro ni vhone, nga Muya wa Mudzimu, ni tshi vusa vhafu,” (Vho vha vhe hone vha ima vha zwi sedza. Ni a vhone?) “huno ri a ḫivha uri inwi ni muporofita wa Murena. Itonu amba Ipfi.”

Nda ri, “Ndi nga si kone u li amba, nn̄dani ha musi lo vhewa mulomoni wanga.”

“Idani Dzheremane.” Nda takutshedza nga u ḥavhanya. Huno vha founa: “Ri na bufho la dzhetheline li nga ni disa Dzheremane nga awara dza rathi.” Dzhethete ya mmbi ye ya vha i tshi do mphuphisela ngei Dzheremane u yo vusa lushie lwo faho. Dzhethete ya mmbi yo vha i tshi do nnyisa henengei nga awara dza rathi, u bva Louisville u ya München, Dzheremane.

<sup>202</sup> Nda dzhena ngomu heneffo, nda gwadama nga magona anga, huno nda ri, “Khotsi, naa ndi fanela u ambani? Amba mulomoni wanga.” Ho ngo mphindula. Nda ya nn̄da mañakan, nda ri, “Khotsi, naa ndi fanela u ambani? Vhea maipfi mulomoni wanga. Ndi do yela liphedzi, arali zwi sa khou ralo.” Nda humela murahu, Ho ngo mphindula. Nda dzhena. Nda rabela vhusiku hothe, “Murena, vhea maipfi mulomoni wanga.” A hu na tshe tsha fhindula.

<sup>203</sup> Nga matsheloni a tevhelaho mufumakadzi wanga a vuwa. Zwenezwo o no ṭuwa, Ipfi (Nda ima), A ri, “U songo zwi kaidza izwi. Itschi ndi tshanđa tsha Murena.” Uh-huh.

Zwenezwo nga u ḥavhanya nda ya kha luñingo: “Ndi nga si kone u ña. Hai, itshi ndi tshanđa tsha Murena. Ndi do

dzivhiswa.” Ni a vhona uri ndi maanda-de kha uho u kaidzwa? Musi Mudzimu o ri, “U songo zwi ita izwo, ngauri ndi tshanda tsha Murena.”

<sup>204</sup> Zwino, Mushe, nga tshiñwe tshifhinga, o vhudzwa uri a si ite tshiñwe tshithu, a ya huno a tshi ita naho zwo ralo. Ni a elelwa? Ngauralo nda—nda sa ye.

<sup>205</sup> Huno ndi nga ni ḫela na zwitatamennde u sumbedza malugana na vhathu vhaṇa vho fhambanaho, vhe, vha bulwa uri vho fa nga madokotela, nga murahu ha thabelo na u kaidzwa ha lufu. Ni a vhona? Ri ima ngomu henehfo u kaidza itsho tshithu. Huno arali Mudzimu o ni ḫea maanda a u ita tshiñwe tshithu, ndi khwine ni tshi vha na vhlondi kha zwine na khou ita zwone. Ni a vhona? Ndi khwine ni tshi vha na vhulo.... O ri, “U songo....”

<sup>206</sup> Zwino, elelwani, izwo zwi nga di si pfale kha vhoiwi nga maanda, fhedzi kha nne, zwo amba tshiñwe tshithu. Ni a vhona?

“U songo zwi kaidza izwi.” Ipfi li difhaho vhukuma, la vhlulenda (i tshi ḫodou rwa hafu u bva kha awara ya rathi, ndi a tenda uri yo vha i yone, hafu u bva kha awara ya rathi nga matsheloni ayo) lo ri, “Izwi u songo zwi kaidza. Itshi ndi tshanda tsha Murena.”

Nda ri, “Ndi a u livhuwa, Khotsi. Ndi a u livhuwa, Murena. A thi nga do zwi ita.”

<sup>207</sup> Arali O vha a tshi do vha o ri, “Zwi kaidze izwi. Ilji ndi swina lo dzenhaho nga u tou suvha.”

Ndo vha ndi tshi do ri, “Kha ri ḫuwe.” Huno zwo vha zwi tshi do vha zwo itwa.

<sup>208</sup> Musi uła mutukanyana ngei Finland o rambalala henehfaļa, o fa, o kwashekana, hu si na shambo lo takalahi muvhilini wawe, Murena o ri, “Itsho tsho vha tshi tshanda tsha Sathane,” a ri, “tshi kaidze.”

<sup>209</sup> Huno nda ri, “Lufu, u nga si mu fare. Mu vhuise, mu vhofholole.” Henehfaļa, a fhufha nga milenzhe yawe, o takala, hu si na na shambo lo vundeaho muvhilini wawe. Ilo ndi Ipfi la Murena. Ndi nga si kone u shumisa Ipfi la Murena u swika Ipfi la Murena li tshi ndela.

<sup>210</sup> Fhedzi kha Luňwalo, Ipfi la Murena lo nne a ndaela ya u rabelela avha vhathu vha īwalaḥo; li ni ḫea ndaela ya u vha rabelela. Zwino, “thabelo ya lutendo i do tshidza mulwadze;” kha ri rabele, ni kotamise zwifhaṭuwo zwaṇu; ri do vhona zwine A amba, ni tshi fhira.

<sup>211</sup> Inwi ni Mukriste, ni ene? Ni a tenda nga mbilu yaṇu yothe uri Yesu u khou yo ni ḫea mutakalo? Ni na vhuileme vhuṭuku ha thumbuni; no tambula ngaho lwa miňwaha, khaladzi. Zwino, ni khou yo vha na mutakalo, arali ni tshi do tenda.

<sup>212</sup> Zwino, Murena Mudzimu, uyu musadzi muswa u fanelu u fa nndani ha musi U tshi mu thusa. Zwino ndi a rabela, ndi tshi mu sedza, a thi vhoni tshiitisi tsha uri a fe.

Huno ndi a pfa tuyani wanga, Murena, uri ndi lufuno Lwau lwe wa lu tendela, zwino, zwine nda zwi kaidza izwi: Sañane, mu vhofholole!

Nga Dzina la Yesu Kristo, ngavhe a tshi vha na mutakalo, a da kha tshino tshivhidzo, huno a nea vhuñanzi u itela vhugala ha Mudzimu. Amene.

<sup>213</sup> Zwino, nga ndila i leluwaho sa zwine izwo zwa vha zwone, mufumakadzi, ni khou yo vha na mutakalo. Naa izwo ni a zwi tenda mukomana?

[Mukomana Branham u sendela kule ha tshihudzaipfi—Mudz.] Naa ni a tenda afha phasi, uri ni khou yo vha na mutakalo?

Tuwani zwino, thomani u la tshine na... zwenezwo ni do, luga tshothe.

Zwino, ni lavhelela u nea shango tshitiroku, huno na li omisa mirado; lo ni nea tshitiroku, nahone li a ni omisa mirado. Zwino, Mudzimu wa Tađulu a no bvisa tshitiroku Tshawe kha shango u nea khangwelo ya tshivhi, nga ilo Dzina lenelo lithihi, a nga ni nea khangwelo ya tshivhi, a bvisa tshitiroku kha inwi, huno a ni nea mutakalo.

Ni a tenda uri A nga ita uri iyo mbilu i divhithe zwavhuđi? Ni tshi ita izwo, ni do vha na mutakalo...?...

<sup>214</sup> Murena Yesu, uyu musadzi a ḥungufhadzaho u fanelu u dzula tshiduloni itshi vhutshiloni hawé hothe huno zwenezwo, a ḥuswa. Fhedzi ri khou humbelu uri aya maända a Sañane a ḥuswe khae. Ngavhe a tshi tshila huno a tshimbila nahone a vha sa nga misi sa zwe a vha e zwone. Ri zwi humbelu Dzinani la Yesu. Amene.

<sup>215</sup> Ni a tenda? Ndi mushumo wo fhelaho, wo itwa. Naa thaidzo ndi mini? Hu si na nyofho, hu si na... Ho vha hu si...? No fhodzwa pfuko nga tshiñwe tshifhinga...?... Vhofholowani, neani Yesu tshiñwe na tshiñwe.

<sup>216</sup> Murena Yesu, ndi vhea tshanda tshanga kha uyu musadzi huno nda kaidza vhulwadze hawé. Ndi a divha uri ene u Mukriste, o bebwaho nga Muya. Ndi vhu bvisa khae, nga Dzina la Yesu Kristo Dzina li mangadzaho. Amene.

<sup>217</sup> Murena Mudzimu, u itela khaladzi awe, ndi humbelu tshidzo yawe nga Dzina la Yesu. Ndi ima kha lelo. Amene. Zwi do itwa.

<sup>218</sup> Naa no dilugisela u ḥanganedza phodzo yañu, murwa? Ndi zwone, zwo no ya tshandani Tshawe.

<sup>219</sup> Murena Yesu, kha uyu muñhannga, we a amba, zwi bvaho kha Iwe, u a rabela u wana phodzo yawe. Sa mulanda Wau, ndi vhea zwanda zwanga khae nga Dzina la Yesu Kristo...?... Amene.

Zwino, tshiñwe fhedzi . . . ? . . . zwino, inwi ni tou vhidzelela Dzina Lawe. Zwino, hu si—hu si kha nñe . . . ? . . .

<sup>220</sup> Khotsi Mudzimu, sa murwa e ethe we a vhuya a ditika nga khana ya mme, vho mu phaphatha nahone—nahone vha rabela nae huno vha fara tshanđa tshiñuku tshawe musi o vha a tshi kha di vha lushie lu lilaho. Zwino, Sañhane o mu dženisa kha tshiimiswa tsha muhumbulo. Mudzimu, o ña kha Tshivhidzo tshikhethwa tsha Mudzimu a tshilaho, Tshivhidzo tsho bebiwaho nga Muya wa Mudzimu, Tshivhidzo tshine Muya wa Mudzimu wa dzula khatsho, nahone a Didivhadza. Huno ñamusi, nga thabelo, ri phulusa uyo musadzi kha itsho tshiimiswa. Nga Dzina la Yesu Kristo, ri a rabela. Amene.

Iyani hayani, no luga tshoþhe.

Ndi a ni livhuwa no ña, ni tshi khou humbelela mme aŋu; uyo ndi murwa wa vhukuma.

<sup>221</sup> Ili ndi duvha la phuluso yanu. Murena Yesu, u itela uyu musadzi muswa, u itela tshidzo ya munna wawe na phuluso ya mukulo wawe, ngavhe a tshi i tanganedza nga Dzina la Yesu Kristo, A no amba zwauri “ida, zwi tendeni zwino,” huno ndi tshibveledzwa tsho fhelaho.

<sup>222</sup> Murena, madokotela o amba, Murena, vhu muvhilini wawe, vhu khou dzhena itoni lawe. O ña u phuluswa, ngeno ñtha kha alitari iyi, itshi Tshivhidzo tshikhethwa tshi tshi rabela, ndi humbela phuluso yawe nga Dzina la Yesu Kristo, iyi ñhamu i ño tutshela muvhili wawe. Ndi mushumo wo fhelaho.

U itela murwa wawe, ndi fhatutshedza sagaduku iyi. Ngavhe u pfa na nyimele dzi re dzone zwi tshi vhuya kha ndevhe yawe . . . ? . . .

<sup>223</sup> Zwino Tshivhidzo tshi a amba; zwino Tshivhidzo ndi Muvhili wa Kristo wo dzumbamaho. Roþhe ri khou ni rabelela. Ni a vhona? A ri—a ri ñiiti vhane vha kha di vha shangoni. A ri khou amba nga ha u mangala hune ra khou ya hone. Ro wana Ndila. Ro bebiwa nga iyo Ndila. Ri Tshivhidzo tsha Mudzimu a Tshilaho (tshipida tshatsho); a hu na zwinwe, tsho balangana shangoni loþhe. Fhedzi itsi ndi tshigwada tshavho. Ñamusi, roþhe ri ña nga Dzina Lawe. Ri ña u ita zwe A amba uri, itani. Zwine A nga si zwi dzumbulule musi ri tshi kuvhangana. U rabelela vhalwadze, u vhea zwanda khavho, “thabelo ya lutendo i ño tshidza mulwadze.”

<sup>224</sup> Ngavhe vhuleme ha mbilu yanu vhu tshi ni tutshela. Nga Dzina la Yesu Kristo, ndi thetshelesa ndaela ye Mudzimu a ñnea yone . . . ? . . .



*IŁO DUVHA KHA KHALIVARI* TSV60-0925  
(That Day On Calvary)

Hoyu Mulaedza nga Mukomana William Marrion Branham, u rangani wo ɻewaho nga Tshiisimane nga matsheloni a Swondaha, Khubvumedzi 25, 1960, Thabereneakełeni ya Branham kha ja Jeffersonville, Indiana, U.S.A., wo dzhiwa kha rekhodo ya theiphi ya maginete huno wa gandiswa u songo pfufhifhadzwa nga Tshiisimane. Heyi ɻhalutshedzo ya Tshivenđa yo gandiswa huno ya phađaladzwa nga vha Voice Of God Recordings.

TSHIVENDA

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Ndīvhadzo ya nzivhanyedziso

Pfanelo dzōthe dzo londolwa. Heyi bugu i nga ɖi gandiswa nga tshigandisi tsha hayani u itela u shumiswa nga muthu ene muñe kana uri i anđadziwe, hu si na mbadelo, sa tshishumiswa tsha u phađaladza Mafhungo-mađifha a Yesu Kristo. Heyi bugu i nga si kone u rengisiwa, u bveledzwa hafhu nga maandesa, ya poselwa kha website, ya vhulungiwa kha sisteme ya u wana mafhungo, ya ɬalutshedzelwa kha dziñwe nyambo, kana ya shumiswa kha u ɬuṭuwedza u humbela tshelede hu si na thendelo yo ñwaliwaho zwi khagala nga Voice Of God Recordings®.

U itela u ɖivha zwinzhi kana u itela zwiñwe zwishumiswa zwi wanalaho, kha vha kwame:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)